

SOTA INSOLAT NEN SAN MARCOS JA MAYPANGKEP NI KABEBIYAG TAN TORO NEN JESUCRISTO

Intoro nen Juan ey ibebawi ni totoo i basol sha

¹ Sota mapteng nga shamag maypangkep son Jesucristo ja Anak nen Apo Shiyos,

² nayshogi nonta engitosho si Juan ja para bonjag. Si-katoy nantongpalan nonta padto nen Isaias nonta bayag da, ja esel nen Apo Shiyos met laeng so ni Anak to, ja kowan to ey,

“Iyay sota ibetkag kon mepangdo ey say si-kam, jet si-katoy mengikowan nodta totoo ey mansekana ira ni imotok mo.

³ Si-kato ali sota toon ikeljaw toy esel to shima dogad ja nay-arawí shi kad-an ni totoo, ja ikowan to ey, ‘Pansagana kayo ta shanshani ma aliy imotok nen Apo! Singpet joy shalan na pan-akshan to!’ ”

⁴ Siya, shima dogad ja nay-arawí shi kad-an ni totoo i nantoro-an nen Juan ja para bonjag. Say intoro to so ni totoo nontan, kowan to ey, “Mese-pol la manbebawi kayo pangkep ni basbasol jo, asan kayoka manpabonjag, say pekawanan nen Apo Shiyos i basol jo!”

⁵ Sota ira tood Jerusalem tan eshom ma toon nanbaley shi probinsiya ni Jodia, ireka manisina-dat ja ondaw son si-kato. Inkowan shen

emin i basol sha say pekawanan ira nen Apo Shiyos; isonga binonjagan ma ira nen Juan.

⁶ Say baro nen Juan, nagshengan: sota na-abel la bowek ni animal ja kowan sha ey camel i toka osala bengat, ja ebalkesan ni kolti. Jet nagshengan ngoy toka kena, ja shoron tan shanom ni dinowan.

⁷ Say intoro pay nen Juan nontan, kowan to ey, “Wara aliy maysa-dat son si-kak ja ebadbadeg i panakabalin to nem say si-kak. Jet ekak pay maykeshi ja baga-en to koma ja mengkal ni sapatos to.

⁸ Dimawak ali ja shanom i inpamonjag ko son si-kayo, nem sotan aliy onbonjag son si-kayo ni Ispirito Santo nen Apo Shiyos.”

Binonjagan nen Juan si Jesus

⁹ Nontan, edapo ngos Jesus shi Nasarit ja ili tod probinsiya ni Galilia ja ondaw shima kawad-an nen Juan, jet nanpabonjag son Juan shima pa-dok ni Jordan.

¹⁰ Idi kima-jat si Jesus nodta shanom, inon-an ton shagos ja edo-katan i dangit, tan inon-an toy Ispirito Santo nen Apo Shiyos ali ja singa inges toy itsora ni kalopati ja emandespag alin onsepa son si-kato.

¹¹ Jet si Apo Shiyos, imesel alid dangit ja kowan to ey, “Si-kam i Anak ko et ensemble taka, tan si-kam i naka pan-imdengi.”

Pineshas nen Satanas ja panbesol si Jesus

¹² Jet nontan, inbetkag ni Ispirito Santo nen Apo Shiyos si Jesus ja ondaw shima dogad ja nay-arawid kawad-an ni too.

¹³ Jet wáres Jesus shiman ni epat ta polon akew, jet pineshas nen Satanás ja panbesol. Saja dogad ja kawad-an nen Jesus nontan, eshakil i atap pa animal, nem nonta kawasha tod man, wára iray anghil ja emengajowan son si-kato.

Sota inpangiroki nen Jesus ni obda to

¹⁴ Nontan ngo ma, naybalod si Juan ja para bonjag. Jet si Jesus, imoli shi Galilia, ja engi-tosho-an to ma ni mapteng nga shamag ja edapo son Apo Shiyos.

¹⁵ Jet kowan to ey, “Niman sota naypadton timpo! Shanshani ma sota naypadton pan-toshayan nen Apo Shiyos! Isonga baliwíyo sota ngaaw wa wáred nemnem jo jet patiyo iya mapteng nga shamag ja naka pan-itoro!”

¹⁶ Idi sakey ya akew, eman-ekad si Jesus shima kilig ni baybay shi Galilia jet inon-an to si Simon, tan si Andres ja agi nen Simon met laeng. Shaka pan-itekna sota embanaw wa balshew sha shi shanom, tep nigay i shaka panbiyagi.

¹⁷ Jet si Jesus, kowan to son si-kara ey, “Kay-olop kayo son si-kak et panbedin takejo ni took, jet mengolnong kayo ngo ni too ja itod-an jo para son si-kak. Aliwá malen sota pengolnong ni nigay i obdayo.”

¹⁸ Jet idi inkowan nen Jesus iyay, indekjas nonta san-agin shagos sota embanaw wa balshew sha, jet si Jesus ma i nay-olopan sha.

¹⁹ Intoloy shen nan-akad jet wára pay i inon-an nen Jesus ja san-agin anak nen Sibidi, ja si Santiago nen Juan. Wára ira nodta bangkara ja shaka pansingpeta sota balshew sha.

²⁰ Jet si Jesus, tina-wal to ira sota showen san-agi ja manbedin ni too to. Jet nontan met laeng, indekjas sha shagos si amesha tan sama ira dinagbo-an ton too nodta bangka, jet eki-odop ira son Jesus, ja nanbalin iren too to.

Inpamapteng nen Jesus i totoon nanpansakit

²¹ Mimotok ira shi siyodad ja kowan sha ey Kapiroaom, jet idi shimanon sota akew wa ngilin ni Hodiyo, ekisa-nop si Jesus nodta baley ya sa-nopan ni Hodiyo, jet nantoro nodtan.

²² Emesshaaw ira sota totood man ni itsora ni toka pengitosho, tep wara et ngo mowan i kepengipateg ni too nonta toka pan-itoro nem say sota toro nonta ira mamaistoro ni dinteg ni Hodiyo.

²³ Jet nontan, nodtan na baley ya sa-nopan, waray toon eman-engaw ja pingketan ni dimonyo. Jet inkedsang nontan i esel to,

²⁴ ja kowan to ey, “Ngantoy! Dimaw ka di ja en meneshal son si-kami? Enshiy kaybiyangan mo son si-kami, Jesus ja i-Nasarit! Amtak nem sipa ka: si-kam sota shinotokan nen Apo Shiyos ja inbetkag to di!”

²⁵ Jet si Jesus, sinelkag to sota dimonyo, ja kowan to ey, “Eka-eket ka! Et ilekjas mo ita too!”

²⁶ Jet sota dimonyo, inpankenkenteg to sota toon pingketan to, jet kimeljaw sota dimonyo, asan kebetik nodta too.

²⁷ Nasshaaw iren emin sota toon engasas; isonga nanbibinaga ira, ja kowan sha ey, “Ngaran emon jay? Emengipeteg gayam iyay ya toka pan-itoro! No ikowan to ey onbetik

i dimonyon pimeket shi too, shaka pati-a nga agpayso!”

²⁸ Jet sajay ya shamag pangkep son Jesus, naywaris shi emin na sakop ni Galilia ja nay-esop nodtan na kawad-an sha.

²⁹ Idi bimo-day si Jesus nodta baley ya kesa-nopi ni Hodiyo, dimaw wa shagos nodta baley nen Simon nen Andres ja san-agi, jet nay-olop ngo si Santiago nen Juan.

³⁰ Simbira sota inepo nen Simon ja bii, ja emansekit, ja empetang nga pasiya i bakdang to. Jet inpa-amtara son Jesus ey emansekit.

³¹ Si Jesus, dimaw nodta shinokolan to jet inegni-an toy takday nonta emansekit jet inatngan ton bimangon. Na-kal sota sakit to jet inkamakaman to ira.

³² Idi mama-shem malen edimos i akew, in-ilaw ni totood man son Jesus i totoon emanpansekit tan angken pay ira sota totoon eman-engaw ja pingketan ni dimonyo.

³³ Eshakel la pasiya i totoon i-Kapirnaom ja esho-kon nodta sakepan ni baley.

³⁴ Jet si Jesus, inpamapteng toy eshakel la totoon emanpansekit ja ekalkalasiy sakit sha, jet eshakel pay i inpabtik ton dimonyo ja pimeket shi totoo. Nem si Jesus, eg to ipalobos ja on-esel ira sota dimonyo tep amtaray katoo to.

Bintikan nen Jesus ira sota toon emengen-enap son si-kato

³⁵ Nonta daem mala, bimangon si Jesus et dimaw shi naydasin na dogad ja enshiy too, jet nansawat son Apo Shiyos shiman.

³⁶ Nem si Simon, tan sota ira kait to, sha inena-enap,

³⁷ jet idi simpol sha, kowan sha ey, “Shakaka en-enapa ni eshakil la totoo.”

³⁸ Nem simongbat si Jesus, ja kowan to ey, “Eti, ondaw kito et shima eshom ma kawad-an ni totoo ja nay-askang shiyay, say mengitosho-ak ngod man ni mapteng nga shamag. Tep si-katoy obdak ja kabol la dinaʻwan ko did jay.”

³⁹ Jet nan-ak-akad si Jesus shi ka-ili-ili ni Galilia, jet nantoro shi kebalbaley ya kesa-nopi ni Hodiyo nodtan iren dogad ja dinaʻwan to, jet inpabtik to pay i eshakil la dimonyon pimeket shi totoo.

Inpamapteng nen Jesus sota toon ebayabayang i bakdang to

⁴⁰ Idi pinsak, waray toon dimaw ali son Jesus ja ebayabayang i bakdang to. Sotan na too, nantolimokod shi sango-an nen Jesus ja emengshaw ni kaasi son si-kato, ja kowan to ey, “No piyan mo, pamapteng mo iya bakdang ko, say eg sha-ak seskigen ni totoo.”

⁴¹ Jet si Jesus, naysemekan; isonga inojad toy takday to et pinishat to sotan na too. Jet kowan nen Jesus son si-kato ey, “Siya, piyan kon onmapteng ka.”

⁴² Jet nay-inshas ngon na-omas sota ira bayang nonta too, jet pimeteng may bakdang to.

⁴³ Jet si Jesus, binidin ton pasiya sotan na too, asan toka ibetkag,

⁴⁴ ja kowan to ey, “Karam ikokowan iyay so ni angken sipa, no diket pandiritso ka et ja ondaw

shima pari. Ipa-sas mo ita bakdang mo son si-kato, ja mimapteng ma. Jet pangidaton ka nonta kowan nen Moises shi dinteg to ey may-deton son Apo Shiyos, say amta-en ni karakdan ey si-kam ket enshi malay bayang mo.” Kowan nen Jesus son si-kato.

⁴⁵ Nem sota toon na-kal i bayang to, inpalewag to ey inpamapteng nen Jesus i bayang to. Jet sajay ya shamag, asdeg ton naywaris pay shima angken arawin dogad. Nakol ni si Jesus, eg mala maka-edaw shi angken nganton siyodad. Nan-iyang ni olay shi naybetaw iren dogad, nem angken wared naybetaw, eg ngoreshan ma-enhiy eshakil la totoon kaondaw son si-kato ja emedepod kompormin dogad.

2

Inpamapteng nen Jesus sota toon eg makakeykey i bakdang to

¹ Idi edabas malay pigen akew, imoli si Jesus shi Kapirnaom. Jet shinemag ni eshakil la too ey wares Jesus shi baley to.

² Esinop i eshakil la totoo nodtan: eposek i naydaem et pati sota sakepan ni baley, epokit ni too.

³ Idi maramen toka pan-itoro son si-kara sota mapteng nga shamag, binangtal ngo di ni epat ta too i sakey ya toon eg makakeykey i bakdang to, ja idaw sha ali son Jesus.

⁴ Nem eg mebedin na i-esop sha son Jesus tep eshakil i too. Isonga ingkal shay atep nodta petek ni toktok nen Jesus, jet idi edo-katan,

inoy-oy sha sota emansekit ja ka-onong nga shimokol shi amaka.

⁵ Idi indasin nen Jesus ey ebadeg i pamatira, kowan to so nonta emansekit ey, “Sota basol mo, epakaʻanan.”

⁶ Nem ʻwara nodtan i eshom so nonta ira mamaistoro ni dinteg ni Hodiyoṣ jet kowan shed nemnem sha ey,

⁷ “Apay nga saman i pan-ikowan niyay ya too? Toka pa-so-i si Apo Shiyos! Kowan to ey ememekawan ni basol, ey enshi met i eshom ma memekawan ni basol nem eg si Apo Shiyos bengat!”

⁸ Nem si Jesus, amta to ey sajay i ʻwared nemnem sha, isonga kowan to son si-kara ey, “Apay nga joka sopngiled poso jo iyay ya kowan ko?”

⁹ Say kowan jo, inba-ngat kon memekawan ni emin na basol niyay ya toon eg makakeykey i bakdang to, ey ekak kabaalan? Nem iyay i dag-en kon pati-an jo so. Ikowan ko so niyay ya too ey on-etan, al-en to ma shinokolan to, asan ma man-akad.

¹⁰ Jet no man-ekad, amta-en jo ey si-kak sota kowan nonta para padto nonta bayag da ey Anak ni Too, tan amta-en jo pay ey ʻwaray kalintegan kod ja dabaw ni shaga ja memekawan ni basol ni too.” Jet si Jesus, inkowan to nonta toon eg man-ekad ey,

¹¹ “Ikowan ko son si-kam, alam ita shokolan mo, jet akad ka!”

¹² Jet siya, bimangon sota toon istay eg makakeykey i bakdang to et inda to sota amaka

to, asan toka ira ilekjas. Jet inon-an ira nonta eshakil la too iyay ya epasamak. Nasshaaw ira et inshayaw sha si Apo Shiyos, ja kowan sha ey, “Enshiy mi inon-an na inges niyay nontan da ingkato niman!”

Inodop nen Jesus si Levi ja manbedin ni too to

¹³ Dimaw mowan si Jesus shima kilig ni baybay et eshakil la pasiya i totoon emansisina-dat ja en simabi son si-kato. Jet intod-an to ira.

¹⁴ Idi naksheng iyay, nan-akad si Jesus say ma-tan nodtan na dogad, jet inon-an to sota toon manngeshan ni Levi, ja anak nen Alpio, ja eman-obded opisina to. Say obda to, para singil ni bowis. Kowan nen Jesus son si-kato ey, “Kala, kay-olop ka son si-kak et manbedin ka ni took.”

Jet si Levi, dimayat et imonod son si-kato, ja nanbalin ni too to.

¹⁵ Jet nontan, engan si Jesus tan sota ira too to shi baley nen Levi, jet ekilikob ira so nonta kait nen Levi ja para singil ni bowis, tan sota eshom ma kowan ni Hodiyo ey enshiy kenshat shen too, ja mabesol kono. Tep eshakil iray inges niyay ja too ton emay-odo-odop son si-kato.

¹⁶ Nem sota eshom so nonta ira Parisiyo, ja mamaistoro met laeng ni dinteg, idi inon-an sha ey emekipengan si Jesus so iren ja toon shaka ibilang ey enshiy kenkenshat sha, kowan sha so nonta ira too nen Jesus ey, “Ngantoy! Emekipengan ima apo jo so ira nima para singil ni bowis tan sama eshom ma toon enshiy kenshat sha, ja eshakil i basol sha!”

¹⁷ Nem idi intenengan nen Jesus iyay ya inkowan sha, simongbat son si-kara ja kowan

to ey, “Ekak ali dimaw ja mengewís ni toon maronong, nem dimawak ali ja mengewís ira nonta toon eshakil i basol sha. Mebedin na may-eshigak shi doktor. Eg bisita-en ni doktor i enshiy sakit to, no diket sota ira wáray sakit to.”

In-aknan to ira ni arig jet say olog to ket emankaisa-dat sota badon toro to

¹⁸ Idi pinsak, sota ira Parisiyo tan sota ira too nen Juan ja para bomjag, inbiyang shay pangan sha tep ireka manngidin. Jet nontan, wára iray eshom ma toon dimaw son Jesus et kowan sha ey, “Sota ira too nen Juan tan too nonta ira Parisiyo, kanayon na shaka ibiyang i pangan sha no manngidin ira, nem apay nga sama toom ket eg sha ibiyang i pangan sha?”

¹⁹ Jet si Jesus, say songbat to son si-kara, in-arig toy bakdang to shi dakin engasewa. Isonga kowan to ey, “Piyon jon ikowan ey sota ira bisita shi kasal ket eg ira mengan angken wára sota dakin engasewa? Enshi a! Kenshat ta mengan ira.

²⁰ Nem wára et mangoy timpon onmotok ali ja ma-enshi son si-kara sota dakin engasewa, jet si-katoy timpon ibiyang sha so ni pangan sha maypangkep ni daringit sha.”

²¹ Jet si Jesus, inkowan to mowan i sakey ya arig son si-kara ja kowan to ey, “Na-alas no maysekab i badon abel shi shaan na baro. No maysekab sota bado, ey onkesen, binaten to sota nayshaitan ton shaan; nakol ni mema-ma sota epi-kat.”

²² Tan wára pay i sakey ya inkowan ton arig, ja kowan to ey, “Na-alas no may-iyán i badon adak shi na-osal la inemag shen katat ja ijanan ni adak, ja kowan sha ey ‘wineskin’. No sotan i pesing jo, pepetjag nonta adak sota nay-iyanan to, jet onkawas sota adak. Tan angken pay sota nay-iyanan to, mepilshi. Mesepol ja no badon adak, bado ngoy kay-inan to.”

Eg nan-inawatan shi Jesus tan sota ira toon mangidin

²³ Idi sakey ya akew wa ngilin ni Hodiyo, nanshalan shi Jesus shi oma ja emola-an, jet idi ireka man-ekad, sota ira too nen Jesus, shaka pan-ina-jon i patod ni dames nonta mola.

²⁴ Nem sota ira Parisiyo, kowan sha son Jesus ey, “Asas mo kari ira ma toom! Apay nga dingkara iman ey kaiparit ni dinteg tayon Hodiyo i mengetod no akew wa ngilin?”

²⁵ Jet si Jesus, simongbat ja kowan to son si-kara ey, “Arig to ngo sota inpasing nen Ari David nonta bayag da ni inka-ekang to, tan sota ira too to, ta enshin polos i kenen sha. Apay eg jo aya amtay dingka to?”

²⁶ Dimaw si David shima tolshen baley ya inbilang sha ey para son Apo Shiyos nonta timpon inpanpari nen Abiatar ja kangeto-an et kinan to sota tinapay ya naydaton son Apo Shiyos. Sajay i inpasing to anta nga nayparit so ni kompormin too i pangan sha nontan na tinapay. Ta sota pari bengat i palobos sa mengan nontan na tinapay. Jet in-aknan to pay ira sota too to.

²⁷ Iyay i nemnemen jo: epangdo i too ja ewara asan mawasha i ngilin ja para pansigshan ni too; aliwen ewara i too say tongpalen to sota dinteg maypangkep ni ngilin.

²⁸ Isonga si-kak ja naypadton Anak ni Too, ja apo ni emin, si-kak met laeng i mengikowan no ngantoy mebedin na dag-en no akew ni ngilin.”

3

Inpamapteng nen Jesus sota toon eki-ngoy

¹ Ekisa-nop mowan si Jesus shi baley ya sa-nopan ni Hodiyo et nontan, naytompong nga wara nodtan i toon eki-ngoy i sakey ya takday to.

² Wara ngoy eshom ma too nodtan ja emeni-siim son Jesus no waray ekasan to nontan na akew, tep kowan sha ey balang nem waray dag-en to ja ikowanan sha so ey nanbasolan to. Ta nayparit kono shi dinteg sha i pengekas no akew ni ngilin.

³ Jet si Jesus, kowan to so nonta toon eki-ngoy i takday to ey, “Daw ka did ja sango.”

⁴ Jet kowan to so nonta ira emeniim son si-kato ey, “Ngaaw aya i pandeka ni mapteng, ono pemiya ni too, no timpon ngilin? Enshi: say ngaaw ja kaiparit ni dinteg tayo, sota pandeka ni ngaaw tan pemono ni too.”

Nem enshiy shaka isongbat.

⁵ Inbonget ira nen Jesus et emandeshingit pay ya pasiya tep shaka ipilit ni olay sota kostora. Sina-sa-key to iren insi-ning, asan to ikowan so nonta toon eki-ngoy i takday to ey, “Oyad mo ita takday mo.”

Pinati nonta eki-ngoy sota kowan nen Jesus et mimapteng mowan nga agpayso sota takday to.

⁶ Nem sota ira Parisiyo, bimo-day ira et nantatabtabal ira so nonta ira too nen Ari Hirodis no ngarantoy pesing shen memono son Jesus.

Emansisina-dat mowan i totoon kaondaw son Jesus

⁷ Si Jesus tan sota ira too to, indekjas sha sotan na dogad et dimaw ired kilig ni baybay. Jet eshakil la pasiya iray toon imonod son si-kato: iman i nankedapod Galilia, iman i nankedapod Jodia,

⁸ iman i nankedapod siyodad ni Jerusalem, iman i nankedapod Idomia, iman i nankedapod ma dogad ja baliw ni pa-dok ka Jordan, tan iman pay i nankedapod ma dogadogad ja diked ni siyodad ni Tira tan Sidon. Saja ira eshakil la totoo, shinemag shay kaskasshaaw wa kedagdag-a nen Jesus, isonga sha ali simbi.

⁹ Inkowan nen Jesus so nonta ira too to ey mengisekana ira ni bangsa ja pan-iyanan to tep kowan to ey baka i-ipit nonta eshakil la totoo.

¹⁰ Ta eshakil i inpamapteng ton toon emanpansekit et emansisikil i emin na toon kaonsanakit ja kowan sha ey pishaten shes Jesus.

¹¹ Jet nontan, wára ngo iray totoon pingketan ni dimonyo et idi inshemang nonta ira dimonyo si Jesus, ireka mantedimokod shi sango-an to, ja shaka pan-ikeljaw ey, "Si-kam i Anak nen Apo Shiyos!"

¹² Nem binidin to iren pasiya ey eg sha ikokowan i maypangkep son si-kato so ni angken sipa.

Pinidi nen Jesus sota sampolo tan showa ja apostol to

¹³ Dimaw si Jesus shi shontog et sina-nop to ali ira sota kinosto-an to, jet dimaw ira son si-kato,

¹⁴ jet shinotokan toy sampolo tan showa son si-kara. Saja ira sampolo tan showa, si-karay ninemnem ton kaiten to ni olay tan si-karay ibetkag ton en mengitosho.

¹⁵ Si-kara pay i piyalen ton angken pebtik sha iray dimonyo ja pimeket shi totoo.

¹⁶ Say ngaran ira nonta sawal ni showa, sajay: si Simon ja inngadnan ton Pedro;

¹⁷ si Santiago nen Juan ja san-agin anak nen Sibidi (saja san-agi, binshayan nen Jesus ni Boanijis, ja piyan ton a-selen ey, “anak ira ni kirol”);

¹⁸ si Andres, Felipe, Bartolome, Mateo, Tomas, Santiago ja anak nen Alpio, si Tadio, sota si Simon ja bitirano,

¹⁹ tan si Judas Iskariote ja mengileko ali so nen Jesus shi anongosto.

Binediktad nonta makakontra son Jesus i obda ni Ispirito Santo, ja kowan sha ey obda ni dimonyo

²⁰ Idi naksheng nga shinotokan nen Jesus ira sota sawal ni showen apostol to, imakad shi baley ya toka pan-iyani nontan. Jet esa-nop mowan i eshakil la totoo nodtan na kadnan sha jet nakol ni ayshiy waya shi ira Jesus ja mengan.

21 Idi amta-an nonta a-aki nen Jesus, dimaw iren kowan sha ey i-akad sha tep kowan sha ey na-kal i nemnem to.

22 Wara ngo iray mamaistoro ni dinteg ni Hodiyo ja edapod Jerusalem ja kowan sha ey, "Pimeket si Bilsibob ja apo ni dimonyo son si-kato." Tan kowan sha ey, "Sota apo ni dimonyo i toka osala ja pebtik so ni dimonyon pimeket shi totoo."

23 Isonga si Jesus, tina-wal to ira et in-aknan to ira ni arig, ja kowan to ey, "Dokodoko itan na kowan jo ey sota apo ni dimonyo i naka osala ja pebtik so ni dimonyo. Taway pesing nen Satanas ja mengipebtik so ni bakdang to shorog?"

24 Ta amta to ey sajay, arig toy ilin manshowa. No manshowen shorog i sakey ya ili, kenshat ta mansisi-jan ira sota totoo nontan na ili.

25 Kasta met sota sanpamilja ja manshowa, mansisi-jan ira sota totoo.

26 Isonga si Satanas, eg mebedin na pebtik to met laeng i kait to, tep amta to ey no bekalen toy bakdang to, tan manbabakal i too to, eg onbayag i pansaad to, no diket menginteg i kabedinan to.

27 "Say agpayso, inebak ko nin sota apo ni dimonyo. Arig to sota matekal la too. Eg kabaalan ni sakey ya toon onsekep shi baley ni matekal la too ja kowan to ey al-en ton emin sota wára nodta naydaem ni baley. Ayshi, kenshat ta say pesing to nin ket bedoren to sotan na too asan toka al-ala-en emin sota wára nodta baley.

28 "Emin iray basol ni too, ono sota ngaaw wa shaka ikokowan, mebedin na mepekawanan,

²⁹ nem sota ngaaw wa shaka ikokowan may-pangkep nonta Ispirito Santo nen Apo Shiyos, eg mebedin na mepekawanan, no diket may-a-det son si-kato ni olay ingkatod ingka.”

³⁰ (Inkowan nen Jesus iyay tep endedamsis ira nonta mamaistoro ni dinteg i Ispirito Santo nen Apo Shiyos, ja kowan sha ey, “Si-kato, waray dimonyon kaontolong son si-kato.”)

En naysabi sota ina nen Jesus tan sota ira a-aki to son si-kato

³¹ Mimotok nontan si ina nen Jesus tan sota ira a-aki ton daleki. Nanseked ired bo-dayan et inpata-wal sha di si Jesus say ondaw ali ja to di ira on-an.

³² Eshakel iray totoon timongaw ja nandikmot son Jesus et kowan sha ey, “Wara si inam tan sota ira a-akim shi bo-dayan, jet piyan shaka konon on-an.”

³³ Nem si Jesus, kowan to son si-kara ey, “Sipay ikarik ja inak, tan sipay ikarik ja a-akik?”

³⁴ Jet inshemang toy totoon timanongaw ja nandikmot son si-kato et inkowan to ey, “Sajay iray ikarik ja innak, tan ikarik ja a-akik!

³⁵ Tep say naka ikarin innak tan a-akik, sota ira mandeka ni piyan nen Apo Shiyos.”

4

In-arig nen Jesus sota kalasin bo-day ja naysapa-an ni botil

¹ Dimaw mowan si Jesus ja en nantoro shi kilig ni baybay et esa-nop i eshakel la totoo son si-kato. Kesoreng si Jesus ey man-a-tan nodta

bangka ja wára nodta shanom. Timongaw si Jesus nodtan, ey sota ira too, wára iren esalpag nodta kilig ni shanom.

² Eshakel i intoro nen Jesus son si-kara, nem poro arig i inaspasing ton engikowan.

Say sakey ya arig ga inkowan to son si-kara, sajay:

³ “Itnengiyo iyay! Waray too ja dimaw wa en manbangkag shi oma.

⁴ Idi toka pan-iwáris sota botil, wára iray nayponta shi shalan, jet kinan ira ni titit.

⁵ Sota eshom ma botil, nayponta ira nodta kabato-an ja ma-ingpis i bo-day to, jet timemel la shagos, tep aliwén masshel i bo-day ja nayponta-an to.

⁶ Nem idi simekal i sekit, nakkit sota ira timemel la botil ta eg shimalem sota damot sha.

⁷ Sota eshom ngon botil, nayponta ira shima similja ni sebit, jet idi bimengis iren showa, na-abak sota temel ni mola jet eg timoloy ya dimames.

⁸ Sota eshom ngon botil, nayponta shima mapteng nga bo-day jet simimit et kimabay. Idi dimames ma ira, waray nandames ni tedon polo, waray nandames ni enem ma polo, tan wára pay i nandames ngo ni sandasos.”

⁹ Jet intobtob nen Jesus ey, “Niman i waray waya jon mengitneng niyay ya naka pan-ikowan, isonga singpet jon itenengan.”

¹⁰ Idi a-abos to, inbag-an nonta sawal ni showen apostol to tan sota eshom pay si Jesus no ngarantoy olog nonta arig ja inkowan to.

¹¹ Simongbat si Jesus ja kowan to son si-kara ey, “Si-kayo nin i naypalobos ja on-awat so ni maypangkep nonta pantoshayan nen Apo Shiyos. Nem sota eshom, arig bengat i pengitoshok son si-kara,

¹² say no angken isi-ning sha, eg sha imatonan sota inon-an sha, jet angken itenengan sha, eg sha amtay olog to. Ta baka man-odi ira son Apo Shiyos et mepekawanan i basol sha.

¹³ “I-olog ko niman sota arig ga inkowan ko la. Nem nasshaawak tep eg jo shagos inewatan i olog to. No eg jo ewatan iyay ya arig, toy pesing jo ngarod ja mengewat ni eshom ma arig?

¹⁴ Say olog nonta arig ga inkowan ko la, sajay. Sota botil ja pan-iwaris nonta too shi oma, may-eshig ey esel nen Apo Shiyos.

¹⁵ Sota nayponta-an ni botil ja shalan, si-katoy kay-eshigan nonta ira toon naykowanani esel nen Apo Shiyos, nem idi itenengan sha, ondaw alin shagos si Satanas ja to dingdingen sota esel la naytoro son si-kara.

¹⁶⁻¹⁷ Sota nayponta-an ni botil la kabato-an, si-katoy kay-eshigan nonta toon engitneng ni esel nen Apo Shiyos ja emati ni sankatikan. No itenengan to, wahren shagos i imdeng ton mengewat, nem eg may-a-det shi nemnem to. Isonga magenon ibi-jag to no onmotok ali sota digat to, ono okesen ni too maypangkep ni in-awat to so ni esel nen Apo Shiyos.

¹⁸ Sota nayponta-an ni botil ja similha ni sebit, si-katoy kay-eshigan nonta toon engitneng ni esel nen Apo Shiyos met laeng,

¹⁹ nem say toka nemnemema, sota pesing

ton manbiyag, sota ekanas sa biyag ni baknang, tan sota kompormin toka kamkamkami. Jet anongosto ma ey medingding sota esel nen Apo Shiyos son si-kato, jet enshi may mapteng nga pantongpalan to.

²⁰ Sota nayponta-an ni botil ja mapteng nga bo-day, si-kato ngoy kay-eshigan nonta toon engitneng ni esel nen Apo Shiyos jet toka ewata. May-eshig ey sajay ira, waray dames sha: waray nandames ni otik, waray nandames ni kalaingan, tan waray nandames ni eshakil.”

In-arig nen Jesus sota kingki ja eg koma mesa-keban

²¹ Kowan pay nen Jesus ey, “Apay al-en jo aya i kingki et sa-keban jo ni timba ono idoong jo shi katiri? Ayshi met: ipa-tok jod ekayang.

²² May-a-mot i sakey ya banag say ma-okat met laeng nem sakey ya akew; sota eg ma-amta-an niman, sigoradon ma-amta-an ali.

²³ Niman i waray waya jon mengitneng niyay ya naka pan-ikowan, isonga singpet jon itenengan.”

²⁴ Inkowan to pay ey, “Singpet jon itenengan iya naka pan-ikowan, tep sota joka penokat, si-kato ngoy penokat nen Apo Shiyos no mengi-kan son si-kayo, ono sodokan to pay.

²⁵ Sota toon mengitneng tan memati, metod-an pay. Nem sota toon endedamsis to, ja eg memati, angken sota ootik ka amta to, ma-enshi pay.” Kowan nen Jesus.

Wara pay i in-arig nen Jesus maypangkep ni pantoshayan nen Apo Shiyos

²⁶ Inkowan mowan nen Jesus ey, “Say kay-eshigan nonta pantoshayan nen Apo Shiyos, inges to iyay. May-eshig shi toon engi-sek ni botil shi bo-day.

²⁷ Sota too, ema-okip nem medebi jet kaon-bangon nem meŵa-wá, jet sota botil la in-esek to, simimit asan ma kekabay, ey eg dimbaotan nonta too i kepesing nonta botil la mandeka niyay.

²⁸ Sota bo-day, si-katoy mengipedemes ni mola: emepangdo nin sota bolong to, asan kebosbos, jet medowem may dames to.

²⁹ Nem angken eg to ewátan na emin, no medowem sota dames to, eni-en to tep simabi ma sota timpo ni pan-eni.”

³⁰ Intoloy nen Jesus ey, “Itnengiyo iya ikowan kon kay-eshigi ni pantoshayan nen Apo Shiyos.

³¹ May-eshig nodta botil ni sakey ya kalasin mola. Sajay ya botil, no may-a-sek shi bo-day, ootilik ka pasiya, ja enshiy kay-ingesan ni ka-ootik to shiya dobong,

³² nem no onba-deg, si-katoy kabalkan so ni emin na mola. Say pangeto, ebadeg et mebedin na man-obong iray titit, shima pangpangeto, ja sotan i pansishoman sha.” Sajay day inkowan nen Jesus.

³³ No mebedin ni totoon ewátan, angken pigen arig i inkowan nen Jesus son si-kara ja kait da iren ja arig ja inkokowan to la.

³⁴ Enshiy eshom ma intoro to so ni karakdan na totoo nontan na timpo, nem eg arig ni olay. Nem idi abos sha so nonta ira too to, in-olog ton emin son si-kara.

Inpasalsheng nen Jesus i makedsang nga shagem man makedsang nga shadoyon

³⁵ Idi mama-shem mala nontan met laeng nga akew, inkowan nen Jesus so nonta ira too to ey, “Eti, ondaw kitejo shima shemang niya baybay.”

³⁶ Jet siya, indekjas sha ma sota eshakil la totoo. Si Jesus, ka-onong nodta bangka ja tinongawan to nontan. Jet wára pay iray kait ton bangka ja nay-olop son si-kara.

³⁷ Idi maramen eman-ekad sota bangka ja ondaw nodta shemang, ebiglen kimedasang i shagem nodta baybay, nakol ni kepanshespega ni shadoyon sota bangka ingkatod eshogi-an ja emankepno sota bangka ni shanom.

³⁸ Si Jesus, wára nodta obet ni bangka ja na-ogip shi kotson, isonga sha binengon, ja kowan sha ey, “Apo! Ngantoy! Shanshani kito men metey, ey eg mokito sintilen!”

³⁹ Bimangon si Jesus et inkowan to so nonta makedsang nga shagem ey onsalsheng, tan inkowan to so nonta shadoyon ey, “Enog! Salsheng ka!” Jet simalsheng nga agpayso sota shagem jet timalna men kosto sota baybay.

⁴⁰ Inkowan ma nen Jesus so nonta ira too to ey, “Ngantoy? Entakot kayo? Ayshi pay laeng aya i pamatiyo?”

⁴¹ Etakot iren pasiya; kowan sha ni sakey tan sakey son si-kara ey, “Sipa emo iyay ya too? Toka pesalsheng iray shagem tan shadoyon et shaka pati-a!”

5

Inpabtik nen Jesus sota ira dimonyo nodta toon eman-engaw ja i-Girgasa

¹ Intoloy shen bimaliw et mimotok ira nodta dogad ja kowan sha ey Girgasa.

² Idi koston simekbit si Jesus ja edapo did ma bangka, inaspol ni sakey ya dakin eman-engaw ja pingketan ni dimonyo. Sajay ya too, edapo did kamposanto, tep nodtan i toka pan-i-iyani.

³ Istay ya shaka bedbedora iyay ya too nontan da, nem niman, angken kolkolong i pemedod sha, toka ketdanga ni olay.

⁴ Eminshakel la binedod sha iyay ya too ni karina tan kolkolong, nem toka ketketdanga ni olay sota kolkolong ja shaka pemedod son si-kato, tan toka sheshala sota karina. Enshiy toon maka-inges son si-kato ja on-abak so.

⁵ Kalebi-an man ono ka-akawan, eman-eka-ekad ja kaonkelkeljaw shima kamposanto tan shima shonshontog, jet toka sogsokata i bakdang to shorog ni bato.

⁶ Idi naybetaw pay laeng si Jesus son si-kato, inon-an nontan na toon eman-engaw. Bintik toy kad-an nen Jesus ja to simbi, jet nantalimokod shi sango-an to.

⁷⁻⁸ Si Jesus, kowan to ey, "Si-kam ma dimonyo, ilekjas mo ita too!"

Jet sota too, inkedsang toy keljaw to, ja kowan to ey, "Jesus! Si-kam ma Anak nen Apo Shiyos ja Kangeto-an! Ngantoy pesing mo ma son si-kak? Pangaasim, karamak shosa-en!"

⁹ Jet si Jesus, inbag-an to, ja kowan to ey, “Sipay ngaran mo?”

Kowan nonta too ey, “Say ngaran ko, si Dinibo, tep eshakil kamin pasiya.”

¹⁰⁻¹¹ Nontan met laeng, wára iray eshakil la keshel la naybolos nodtan na shontog. Jet sota toon pingketan nonta dimonyo, emekika-kaasi son Jesus ey eg to peki-nan ira sota dimonyo shima kad-an sha,

¹² jet kowan sha ey, “Palobosim kami ka ja man-a-tan so nima keshel la naybolos, say onpeket kami son si-kara!”

¹³ Jet inpalobos nen Jesus. Jet sota ira dimonyo, indekjas sha sota too et pimeket ira nodta eshakil la keshel. Jet sota ira keshel, namtik iren nan-ekas shima shepdas et dimened ira shi baybay. (Say karakil ira nonta keshel, ondaw wa showen dibo.)

¹⁴ Sota ira toon istay emanbantay so ira niyay ya keshel, kinano-an shen inparemag sota epasemak shi siyodad tan shima eshom ma kait sha. Jet sota toon engitneng niyay ya shamag, dimaw ira ali et sha inon-an no ngarantoy epasemak.

¹⁵ Jet simbires Jesus, tan sota toon istay pingketan ni dinibon dimonyo, ja mimapteng may nemnem to. Timongaw ja nanbaro ma. Jet timakot iren emin.

¹⁶ Jet sota ira para bantay ni keshel ja engasas ni inpan-etan ni dimonyo, inkowan shay inpas-ing nen Jesus ja inpabtik so ni dimonyo.

¹⁷ Jet sota ira too nodtan na dogad, kowan sha son Jesus ey no mebedin koma, idekjas to sotan na dogad sha.

¹⁸ Isonga si Jesus, nandogan shi bangka et emanda-da-jat ma. Nem sota toon istay pingketan ni eshakil la dimonyo, inbag-an tos Jesus nem mebedin na mekidaw son si-kato nodta bangka.

¹⁹ Nem si Jesus, eg to intolok. Inkowan et nen Jesus son si-kato ey, “Akad ka, mo ikowan so ni kagajem mo i mapteng nga inpasing nen Apo Shiyos, ja engi-kan ni kaasi to son si-kam.”

²⁰ Jet sota toon mimapteng, imakad jet to insodsod so ni tootod siyodad ni Dikapolis i kaskashaaw wa dingka nen Jesus son si-kato. Jet nasshaaw wa emin ira sota engikowanan to.

Emati ira sota showen too son Jesus et ki-naasi-an to ira

²¹ Nandogan si Jesus shi bangka et bimaliw shima naymamang nga kilig ni baybay. Jet sota eshakil la too, esa-nop ira son Jesus nodta kilig ni baybay ja nandisaagan to.

²² Jet nontan, wára ngoy mimotok alin too ja si Jairo i ngaran to, ja pangolo ni baley ya sa-nopan ni Hodiyo. Idi inon-an tos Jesus, nantalimokod shi sango-an nen Jesus,

²³ ja kowan to ey, “Pangpangaasim apo, kay-olop ka son si-kak shi baley ko, ta sota anak kon bebii, emanpatpatey. Isonga pangaasim, mo isakpal i takday mo son si-kato, say onpeteng et mebiyag.”

²⁴ Timolok si Jesus et ekidaw son si-kato. Jet eshakil la pasiya i toon nay-olop son si-kara, ja eman-i-inipit shi shalan, nakol ni pati si Jesus, emanka-ipit.

25 Jet wára ngoy sakey ya biin naydaok ja nanshala ni sampolo tan showen tawen.

26 Ebayag ga nansasa-dat i eshakil la doktor ja engagas son si-kato et kinasto ton emin i wára son si-kato, nem enshi met i to dinekna ja to na-agasan; nem ema-ma et ngo mowan.

27 Sigod ja shinemag to i mapteng nga kepesing nen Jesus, isonga ekisikil la imonod son Jesus et pinishat toy baro nen Jesus.

28 Tep sota bii, kowan tod nemnem to ey, “No pishaten kos Jesus, angken sama baro to bengat, onmaptengak ma.”

29 Jet siya, idi pinishat toy baro nen Jesus, simalsheng nga shagos sota toka pansheda, jet dinekna to ma ey na-kal sota sakit to.

30 Nem idi koston pinishat toy baro nen Jesus, dinekna ngo nen Jesus ey wáray na-agasan ja emirat son si-kato. Nanposipos nodta kawa ira nonta eshakil la too et kowan to ey, “Sipay emirat niya barok?”

31 Kowan ira nonta too to son si-kato ey, “Eshakil met ira ja totoo ja nandikmot son si-kam et shakaka pan-ipita pay, ey apay nga moka pan-ibaga no sipay emirat son si-kam?”

32 Nem inshemang nen Jesus ira sota toon nandikmot son si-kato, ta toka pan-enapa sota toon pimirat son si-kato.

33 Sota bii, emanbebayedbed ni takot to tep amta to sota inka-ekas to ni inspirat to so nonta baro nen Jesus. Isonga nantalimokod shi sango-an nen Jesus jet insodsod ton emin i podno son si-kato.

³⁴ Jet kowan ma nen Jesus son si-kato ey, “Anak ko, say minaptengan mo, sota pamatim son si-kak. Daw ka ja wára may talna son si-kam. Na-kal ma ita sakit mo.”

³⁵ Nonta marama ja pan-ikowan nen Jesus iyay, wára diy inbetkag shen edapo nodta baley nonta pangolo ja emansekit i anak to, jet kowan nonta naybetkag so nonta pangolo ey, “Kosto. Angken eg mo odopen ita maistoro. Enshi met laeng i silbi ni idaw to tep etey sota anak mo.”

³⁶ Nem si Jesus, intenengan to sota inkowan nonta too ey naksheng nga etey sota nga-nga, jet inkowan to son Jairo ey, “Kareka manshanag; pamati ka bengat.”

³⁷ Idi naksheng iyay, say inpalobos ton may-odop son si-kato bengat, si Pedro tan si Santiago nen Juan ja san-agi.

³⁸ Jet idi mimotok ira nodta baley nonta pangolo, inon-an nen Jesus ira sota totoon kaonnganogngog; ireka mannoteng nga pasiya ni nangis sha.

³⁹ Simekep si Jesus et kowan to son si-kara ey, “Ngantoy? Kayoka mannoteng ni nangis jo? Eg etey itan na nga-nga; na-ogip bengat.”

⁴⁰ Nem sota ira totoo, inbi-wisan sha bengat si Jesus.

Inpabo-day to iren emin et say ebay-an bengat ja intolok to, sota tedon too ton inodop to, pati sota ama tan ina nonta nga-nga. Jet dimaw ira nodta naydaem ma kad-an nonta nga-nga.

⁴¹ Inegni-an toy takday nonta nga-nga et inkowan to son si-kato ni esel sha ey, “Talita

komi!” (Say olog nonta inkowan to, “Ikowan ko son si-kam anak, bangon ka!”)

⁴² Jet bimangon na shagos sota nga-nga et nan-akad, tep say tawen to, sampolo tan showa. Jet nasshaaw iren pasiya sota engoney so.

⁴³ Nem kowan nen Jesus son si-kara ey, “Karejo ikokowan shi eshom iyay ya epasemak niman. Akniyo et mango iya anak jo ni kenen to.”

6

Si Jesus, dinamsis ira nonta totoon kaidiyan to

¹ Idi naksheng iyay, imakad si Jesus shi ili to, jet inodop to ira sota too to.

² Shimanon i akew wa ngilin ni Hodiyo et en nantoro si Jesus shima sa-nopan ni si-karen Hodiyo. Jet sota ira too nodtan, ireka messhaaw nonta maypangkep ni toro to, ja kowan sha ey, “Towa emoy inamta-an to so nima toka pan-itoro? Toway inashalan to so niman na daing to? Ngaranto emoy inpasing ton dimaga so nima kaskasshaaw wa toka dagdag-a?”

³ Sajay emo met sota anak nonta kalapintiro! Aliwa ayen si-kato sota anak nen Maria? Amta tayo met sota ira a-aki to ja si Santiago, Jose, Judas, tan si Simon. Tan iyay pay ired jay sota bibiin a-aki to!” Jet sotan iren kaidiyan to, dinamsis sha si Jesus.

⁴ Nem si Jesus, kowan to son si-kara ey, “Emin ira sota toon inbetkag ali nen Apo Shiyos, mebedin na mayshedjaw shi emin na ili. Nem shi mison ili to bengat i eg to kayshedjawan, tan

angken pay shi mismon partidos to tan pamilja to.”

⁵ Jet shima ili ton mismo, eg bedinan nen Jesus ja mandeka ni eshakil la milagro. Sajay bengat i dingka tod ma mismon ili to: wára iray ingkal ton sakit ni too ni toka pengisakpal ni takday to son si-kara, nem aliwén eshakil.

⁶ Jet nasshaaw si Jesus tep eg ira memati son si-kato.

Jet pinasiyal to sota ira kawad-an ni too nodtan na dogad jet intod-an to ira.

Inbetkag nen Jesus sota sampolo tan showen apostol to shima eshom ma ili

⁷ Sina-nop ma nen Jesus ira sota shinotokan ton sawal ni showen apostol to et inkowan to ey ondaw iren sansheshedwa shi eshom ma dogad. Jet kowan to son si-kara ey, “Ipiyal ko son si-kayo ey angken sama ira dimonyo ja pimeket shi totoo, mebedin na pebtik jo.”

⁸ Jet inparit toy panbedon sha ni mekan ono pilak, ono pengegnira ni bayong. Say inpalobos to bengat ja mebedin na itakin sha ket sota pengegnira ni sowan.

⁹ Binidin to ira ey mansinilas ira, nem eg sha kono itakin i baron pansa-datan sha.

¹⁰ Kowan to pay ey, “No sipay mengewis son si-kayo, si-katoy pan-inan jo ni olay ingkatod pan-a-tan jod eshom ma dogad.

¹¹ Nem no sota dogad ja motoken jo ket eg shakejo ewaten, ono eg sha pati-en i itoro jo son si-kara, sota depok ja naypeket shi sediyoy, pokpok jo nin asan joka ilekjas sotan na dogad. Ta si-katoy pengamta-an sha so ey enshi may

bibiyang jo son si-kara.” Kowan nen Jesus so nonta ira apostol to.

¹² Jet sota ira too to, dimaw ira et nantoro ira nodta emin na dinadaŵan sha, ja inkowan sha so ni totoo ey manbebawi ira maypangkep ni basol sha.

¹³ Jet eshakil i inpabtik shen dimonyo ja pimeket shi totoo, jet pinojokan sha pay ni dana i eshakil la toon emanpansekit, jet inpamapteng sha ira.

Sota maypangkep ni inkatey nen Juan ja para bonjag

¹⁴ Nontan na timpo, si Ari Hirodis, shinemag to sota maypangkep ni dingdingka nen Jesus, tep pan-i-etek ni karakdan na too si Jesus, jet kowan to ey, “Sajay ya shinemag kon too, sigosho si-kato emo si Juan da ja para bonjag. Nanbiyag emo shi patey, isonga wáray panakabalin ton mandeka ni milagro.”

¹⁵ Nem say kowan ngo ni eshom, si-kato si Elias ja para padto nonta bayag da, tan sota ira eshom pay, say kowan sha, si-kato konoy para padto nen Apo Shiyos ja inges nonta nankepangdo len para padto nonta bayag da.

¹⁶ Nem si Hirodis, idi shinemag to sota maypangkep son Jesus, kowan to ey, “Sajay ya too, si-kato da si Juan. Pinotolan koy toktok to, nem iyay mowan na nan-ongal.”

¹⁷⁻¹⁸ Sajay i pan-inemnem nen Hirodis tep mismon si-katoy inpabono so nen Juan. Inpa-shel to nontan et inpaibalod to, ta idi inesawa nen Hirodis si Hirodiyas ja asewa nen Felipe ja agi to,

inkowan nen Juan so nen Ari Hirodis ey, “Parit shi bilin nen Apo Shiyos i pengesawam so nen Hirodiyas.” Isonga inpa-shel nen Hirodis si Juan, ta pipiyan to si Hirodiyas.

¹⁹ Si Hirodiyas, en-og-oges to si Juan, jet piyan ton bono-en. Nem enshiy mebedin to,

²⁰ tep si Ari Hirodis, entakot to si Juan et toka ibaliwi ni olay. Amta nen Hirodis ey si Juan, eshiyosan na too ja in-apil nen Apo Shiyos ja mansilbi son si-kato. Idi itenengan nen Hirodis i pan-ikowan nen Juan, emandikat i nemnem to, nem piyan to met laeng karin mengitneng ni kowan to.

²¹ Nem idi sakey ya akew, waray pinekan nen Ari Hirodis ja eshaket la totoo ni inpanbirthday to. (Sotan ira inewis nen Hirodis nontan, sota ira nankengaton toray ni gobirno, sota ira apo ni solsharo to, tan sota ira eshom ma pangolo ni probinsiya ni Galilia.) Jet nontan, inshingan nen Hirodiyas ja engipabono son Juan.

²² Tep nontan, nansada sota anak nen Hirodiyas ja marikit, jet eman-i-imdeng si Ari Hirodis tan sota ira naydikob son si-kato. Kowan nen Ari Hirodis so nonta marikit ey, “Ngantoy kekshawen mo son si-kak? Ikowan mo say i-akan ko.”

²³ Nansangba pay ja kowan to ey, “Angken ngantoy kekshawen mo son si-kak, i-akan ko! Angken kagoshowa niya ilin intorayan ko, i-akan ko son si-kam no si-katoy kekshawen mo!”

²⁴ Bimo-day sota marikit et to simbi si ineto, jet inbag-an to ey, “Ngarantoy kekshawen ko?”

Simongbat si Hirodiyas ja ineto, ja kowan to ey, “Keshaw moy toktok nen Juan ja para bonjag.”

²⁵ Jet sota marikit, aliston dimaw so nen Ari Hirodis et inkowan to ey, “Piyan kon i-akan mo ali son si-kak sota toktok nen Juan ja para bonjag; ipingkan mo di shi embanaw wa pingkan!”

²⁶ Jet sota ari, naydaw-an na pasiya ni inkowanan to so nonta kari to so nonta marikit. Nem mesepol la tongpalen to ta nankari ja intenengan pay nonta ira bisita to.

²⁷ Isonga engibetkag si Ari Hirodis ni solsharo ton kowadja ja en mengeda ni toktok nen Juan. Sota solsharo, dimaw ja to inokdo-an si Juan nodta kad-an tod badoran.

²⁸ Jet sota toktok nen Juan, inpingkan to et in-akan to so nonta biin anak nen Hirodiyas et to ngo in-akan so nen ineto.

²⁹ Idi inamta-an ngo nonta ira too nen Juan, sha inday bakdang to et sha indiyang.

Pinekan nen Jesus sota dimen dibon totoo ja imonod son si-kato

³⁰ Sota ira apostol nen Jesus ja inbetkag to, imoli ira di et esa-nop ira son si-kato. Jet insod-sod sha son si-katon emin sota dingdingkara tan intoro sha nodta dinawdaŵan sha.

³¹ Jet inkowan nen Jesus son si-kara ey, “Eti, ondaw kitod sakey ya dogad ja abos tayo say man-ibdey kayo ni otik.” Tep emansisina-dat i eshakil la totoon kaonmotok nodta kad-an sha; isonga ayshiy ŵaya shen angken mengan.

³² Jet siya, nandogan ired bangsa et dimaw ma ira shima naydasin na dogad ja enshiy totoo.

³³ Nem eshakil i toon engasas ni indaw sha la, jet inimatonan sha ira. Jet say inpasing ira nonta toon nankedapo shi eshakil la dogad, kinano-an sha ngon nan-akad, jet epangdo iren mimotok nodta dogad ja dawán nen Jesus.

³⁴ Idi mandisaag si Jesus nodta bangka, inon-an to ira sota eshakil la toon nay-aspol et nayse-mekan na pasiya son si-kara, ta say inpangid-mang to son si-kara, singa na-na-josan ira ja en-shi malay namnama shen pansigshan. Singa sota kalniro iren nay-oway ja enshiy emengajowan son si-kara. Jet eshakil i intoro to son si-kara.

³⁵⁻³⁶ Idi enaswíl malay akew, sota ira too nen Jesus, dimaw ira di son si-kato jet kowan sha ey, “Apo, arawí met iyay ya dogad shi kebalbaley, isonga pansisi-jan mo ira jay ya totoo say ira di koma mengenap ni tongkalen shen kenen sha shima kad-an ni totoo. Edabi met mala.”

³⁷ Nem simongbat si Jesus ja kowan to ey, “I-akniyo et ira ni kenen sha.”

Kowan ma nonta too to ey, “Apay si-kami aya i en menongkal ni kenen sha? Adipay banol ni showen dasos emoy kasto-en mi!”

³⁸ Kowan nen Jesus ey, “Pigen boknol la tinapay i wára son si-kayo? Jo on-i.”

Sha binidang et inkowan sha son Jesus ey, “Dima, tan ima pay i showen piskaw.”

³⁹ Jet inkowan nen Jesus so nonta ira totoo ey ontongaw ira, ja mandinasin konod eshakil la gropo, tep mapteng i edet nodtan.

⁴⁰ Jet siya, ekalbat iren timongaw, ja sandeda-sos i wáred sakey ya kalbat, tan imay sandi-men polo shi eshom ma kalbat.

⁴¹ Jet si Jesus, inda to sota tinapay tan sota showen piskaw, intangkak tod naykayang jet nan-iyaman son Apo Shiyos. Idi naksheng nga nan-iyaman, shinowashowa to sota tinapay asan toka i-kan so nonta ira too to, ja si-karay mengiweshis so nonta ira eshakil la totoo. Jet inpaiweshis to mowan sota showen piskaw so ira nonta totoo.

⁴² Sota ira totoo, engan iren emin et napsel ira.

⁴³ Idi naksheng iren engan, inolnong ira nonta too nen Jesus sota ebay-an ja eg kinan ira nonta totoo ja tinapay tan piskaw, jet say na-olnong, sampolo tan showen basket, ja nankepno.

⁴⁴ Jet say kabebilang ira nonta totoo ja engan, dimen dibon daki, powira ira sota bibii tan a-anak, ja eg naybilang.

Nan-akad si Jesus nodta tapew ni shanom

⁴⁵ Idi naksheng iyyay, inkowan nen Jesus so nonta ira too to ey, “Pandogan kayod ma bangka et angken mepangdo kayon ondaw shima she-mang niya baybay, shima siyodad ni Bitsaida. Jet si-kak, pansisi-jan ko nin ira ja eshakil la totoo.”

⁴⁶ Jet idi indekjas to ira, timiyed shima shontog ja en manshewat so nen Apo Shiyos.

⁴⁷ Jet edabi-an nodtan ja a-abos to.

Nem sota bangka ja nandoganan ira nonta too to, imarawi ma nodta kilig ni baybay.

⁴⁸ Inon-an nen Jesus ey ireka mandikat ni shaka pan-ekad shi baybay tep emansheshagem et nay-aspol pay son si-kara i shagem. Isonga idi daem, dimaw si Jesus son si-kara ja nan-akad shima tapew ni shanom. Istay dabsan to ira,

⁴⁹ nem sota ira too to, inon-an sha ali ja eman-ekad shima tapew ni shanom, jet kowan sha ey banig i inon-an sha. Isonga kimeljaw ira, ⁵⁰ tep emin ira, ireka mankel-ew ni in-asas sha so.

Nem si Jesus, imesel la shagos son si-kara, ja kowan to ey, “Pesed! Karekayo ontakot, tep si-kak iyay!”

⁵¹ Jet idi ekilokan ma ngos Jesus nodta bangka, simalsheng ma sota shagem. Sota too to, nasshaaw ira,

⁵² tep eg sha pay laeng inewatan ey eg nagshengan i kabedinan nen Jesus, angken inon-an sha sota inparakelan nen Jesus so ni tinapay. Etangkan pay laeng i nemnem sha.

Inpamapteng nen Jesus sota emanpansekit shi Ginisarit

⁵³ Jet nontan, intoloy shen bimaliw et simabi ira nodta nayshemang nga dogad ja kowan sha ey Ginisarit. Jet insinged sha sota bangka.

⁵⁴ Idi kima-jat ira nodta kilig ni baybay, inimatonan ira nonta totoo nodtan na dogad ey si Jesus,

⁵⁵ jet nansisi-jan sota ira totoo ja dimaw nodta kedogadogad ja sha al-en sota ira emanpansekit. Jet sota shemagen shen kad-an nen Jesus, si-katoy pengidawan sha ni toon emanpansekit.

⁵⁶ Angken toway dawán nen Jesus nontan — shi siyodad, shi baryo, ono shi angken nganton kawad-an ni too — wáren kenshat i emaysespa ja totoon emansekit, jet kinshaw sha ni olay son si-kato ey no mebedin, angken sota kajaran ni

baro to i pishaten sha say onmapteng ira. Jet emin sota ira emirat son si-kato, mimapteng ira.

7

Inkowan nen Jesus i ngaaw wa aramid nonta ira Parisiyo

¹ Sota ira Parisiyo tan sota eshom so nonta ira mamaistoro ni dinteg ni Hodiyo ja edapod Jerusalem, ira nay-aspol son Jesus.

² Inon-an sha sota eshom so nonta too nen Jesus ja ireka meng'an ey eg ira nin nanbolo, jet shaka pan-inemnem ey edogit mala iren too.

³ Tep emin na Hodiyo — agdalo iray Parisiyo — amp'et manbodo ira nin asan ireka mangan, tep shaka patkin pasiya sota ogadin inbangon ni apo sha nonta bayag da.

⁴ No mepewil ired malkaro, amp'et odsan shay bakdang sha asan ireka mangan, ta shaka ibilang ey waray edogit ta naypek'et son si-kara alid malkaro ja kawad-an ni eshakil la totoo. Eshakil pay i shaka on-onora ja ogadira: kaspangarigan sama ira maypangkep ni ki-wan ni tasa, takori, tan kambang.

⁵ Isonga inbag-an ira nonta Parisiyo tan maistoro ni dinteg si Jesus, ja kowan sha ey, "Apay nga sama ira toom ket eg sha pati-en sota sigod ja ogadi nonta bayag da? Ireka meng'an ey eg ira nin manbodo."

⁶ Si Jesus, sinongbatan to ira ja kowan to ey, "Si-kayo ngon toon kowan to ey wara son Apo Shiyos ni emin na poso to nem waray pangkep

jon ngaaw! Agpayso ey si-kayo sota kaytoshongan nonta padto nen Isaias nonta bayag da ja esel nen Apo Shiyos met laeng, ja kowan to ey,

‘Sajay iren too, shi bongot bengat i engintegan ni shaka panshedjaw son si-kak, nem shi nemnem sha, arawí son si-kak.

⁷ Enshiy silbi ni shaka panshedjaw son si-kak, tep say shaka itodtoro ni olay, sota edapo met laeng shi nemnem ni si-karen too, asan sha mango ikowan ey bilin kono nen Apo Shiyos.’ Kowan ni esel nen Apo Shiyos ja naypadto.

⁸ “Jet si-kayo, joka ibiyang sota koston bilin ja edapo son Apo Shiyos, ey joka et ngo mowan nemnemnema i ogadi ni too!”

⁹ Inkowan pay nen Jesus son si-kara ey, “Kayoka takal ja mengibiyang ni koston bilin ja edapo son Apo Shiyos, say kowan jo ey ki-detan joy ogadiyo!

¹⁰ Kaspangarigan say sakey ya bilin nen Apo Shiyos ja joka ibiyang, sota kowan to ey, ‘Shayaw mo si amam tan si inam’, tan sota kowan to pay ey, ‘Sota toon ngaaw i toka ikokowan so nen ameto ono si ineto, kenshat ta mebono.’

¹¹ Nem si-kayo, say joka itoro, kowan jo ey mesepol la ibiyang ni too si ameto ono ineto, no ikowan to ma son si-kara ey, ‘Sota istay i-akan ko son si-kayo ja panbiyag jo koma, si-kato ma niman sota kowan sha ey Korban, tep indasin kon maytodong shi Timplo.’

¹² No sotan i ikowan ni too son ameto ono si ineto, joka iparit i penodong to ma son si-kara.

¹³ Isonga sajay ya joka pengonod ni ogadiyon joka itoro, inpaskit jo nodta koston bilin nen Apo

Shiyos, ja singa enshiy silbi to. Jet aliwén sajay bengat, no diket eshakil i kait niyay ya ngaaw wa joka dagdag-a ni olay!”

¹⁴ Jet si Jesus, tina-wal to ira sota totoo ey ondaw ira di son si-kato jet kowan to son si-kara ey, “Itnengi jon emin iyay ya ikowan ko son si-kayo jet awatiyo.

¹⁵ Kowan ira nonta Parisiyo ey basol kono no eg kito manbodo asan mangan, ja si-katoy ondogit so ni nemnem. Nem aliwén sota ikem-ot jod bongot ja tetdenen jo i ondogit son si-kayo, no diket say ondogit so ni too, sota esel ton emedepo did poso to tan nemnem to.

¹⁶ Niman i waray waya jon mengitneng niyay ya naka pan-ikowan, isonga singpet jon itenengan.”

¹⁷ Idi bintawan nen Jesus sota eshakil la totoo, ja simekep nodta baley, insho-pet nonta ira too to no ngarantoy olog nonta arig ga inkowan to la.

¹⁸ Jet si Jesus simongbat ja kowan to ey, “Apay angken si-kayo, eg kayo maka-aw-awat? Apay eg jo amta ey sota maykem-ot shi bongot ket eg mebedin na si-katoy ondogit so ni nemnem ni too?

¹⁹ Tep eg met manshedan shi poso, no diket say dawán to, shi ekes, jet onbo-day met laeng.” (Say sakey ya kaytoshongan niyay den inkowan nen Jesus, eg mesepol la mengidin i angken nganton mekan.)

²⁰ Jet intoloy nen Jesus ey, “Say agpayson kaondogit ni too, sota esel ton emedepo did poso to tan nemnem to.

²¹ Ta say kedepo-i ni ngaaw wa pangkep ni too, shi nemnem to. Isonga wáray ememii tan emekileki,

²² wáray emengibot, wáray ememono, wáray emengamkam ni kompormi, tan wáray toon maledamsis. Isonga wára pay iray emenaol ni kait to, wáray toon enshiy baing ton mandeka ni angken nganto, wáray ma-epal, wáray emenomang ni kait to, wáray edastog, tan wára pay iray eshom ma mandeka ni ekalkalasin dokodokon aramid.

²³ Emin ira jay ya ngaaw, nankedapod nemnem ni too jet sotan iray kaondogit ni too ja mankebol ni panbesolan to.” Kowan nen Jesus.

Sota kaba-deg ni pamati ni sakey ya biin aliwén Hodiyos

²⁴ Nontan ma si Jesus, indekjas to sotan na dogad jet dimaw shi sakey ya dogad ja nay-esop shi siyodad ni Tira. Kowan to ey manpokok nin shi sakey ya baley shiman, nem eg mebedin. Inamta-an shagos ni totoo nodtan ey wares Jesus,

²⁵⁻²⁶ jet wáren shagos i simabi alin bii ja aliwén Hodiyos ja poli nonta sigod ja too nodtan na dogad. Sajay ya bii, wáray anak ton bii ja pingketan ni dimonyo; isonga idi shinemag to ey wares Jesus, dimaw ali et nantalimokod shi sango-an nen Jesus et ekika-kaasi son Jesus ey pebtik to sota dimonyon pimeket nodta anak to.

²⁷ Say songbat nen Jesus son si-kato, in-aknan to ni arig, ja kowan to ey, “Mepekan koma nin i

a-anak. Aliwén nebeng ja nak pekéwas sota istay para a-anak ja i-akan ko so ni aso.”

²⁸ Nem inewatan nonta bii sota arig to, jet kowan to ey, “Owen niti apo, amtak ita kowan mo. Nem angken sota ira aso shima naydoong ni damisaan, mebedin met ja manbiyag ira nonta ema-kas shi damisaan na kepengani ni a-anak!”

²⁹ Simongbat si Jesus so nonta bii ja kowan to ey, “Kostoy songbat mo. Angken on-akad ka ma niman, tep bimetik mala sota dimonyo ja pimeket nodta anak mo.”

³⁰ Jet idi mimotok sota bii shi baley to, simbi to sota anak ton emansheshokol shi katiri ja mimapteng ma. Namtik da sota dimonyon istay pimeket son si-kato.

Inpamapteng nen Jesus sota toon omel

³¹ Idi nan-oli si Jesus ja edapo did ma dogad ja kasekohan ni Tira, shindan toy Sidon asan ma manshalan nodta naykawa ni dogad ja kowan sha ey Dikapolis, ingkato nodta baybay shi Galilia.

³² Jet in-ilaw ni too son si-kato i sakey ya toon etoleng tan eg metongolan na polos i esel to. Jet shinewat sha son Jesus ey pishaten to kono say onmapteng.

³³ Si Jesus, to indasin sota etoleng nga too, ja bintawan sha sota eshakil la too, jet idi showa bengat ira, indolot nen Jesus i kalomot to shi showen tangida nonta etoleng. Timopsha si Jesus et pinishat toy shila nonta etoleng,

³⁴ asan ma ketangkak shi naykayang. Ngimed-as si Jesus jet kowan to so nonta etoleng,

ni esel shen Hodiyo ey, "Ipata!" (Say olog nonta inkowan nen Jesus, "Kalokati ka!")

³⁵ Sotan ey mebedin men mantetneng sota istay etoleng, jet kasta met sota toka pandikat ja on-esel: mapoot may toka pan-a-sel.

³⁶ Jet kowan ma nen Jesus so nonta ira totoo ey, "Karejo ikokowan iyay so ni angken sipa."

Nem angken intalengteng nen Jesus i bilin son si-kara, ey eg sha pa-amta shi eshom, mas pay et ja inshamashamag sha sota kaskasshaaw wa dingka to.

³⁷ Jet nasshaaw wa pasiya sota ira totoo, jet kowan sha ey, "Emin na kedagdag-a nen Jesus, mapteng. Angken sota ira nanketoleng, toka pantetneng, tan sota nanka-omel, toka pa-sel."

8

Sota maykepinshowen inpara-kelan nen Jesus ni ootik ka mekan

¹ Nontan na timpo, esinop mowan i eshakil la totoo, jet na-bosan ira ni kenen sha. Tina-wal nen Jesus ira sota too to jet kowan to son si-kara ey,

² "Naka kaasi-i ira ja totoo, ta tedon akew sha niman ja wared jay son si-kak jet enshi may kenen sha.

³ Jet no pa-ekad ko ira ja eg nin mengan, baka onkapoy ira shi shalan."

⁴ Jet sota ira too nen Jesus, kowan sha ey, "Toway en pengal-an ni maypekan so iren ja eshakil la totoo? Enshi met i baley shiyay ya dogad."

⁵ Jet si Jesus, kowan to son si-kara ey, “Pigen boknol la tinapay sota wára son si-kayo?”

Simongbat ira ja kowan sha ey, “Pito.”

⁶ Jet si Jesus, inkowan to so nonta ira totoo ey ontongaw ira nodta bo-day. Inda to sota piton boknol la tinapay et nan-iyaman so nen Apo Shiyos asan toka showashowa-a. In-akan to so nonta ira too to say si-karay mengiweshis so nonta ira totoo, jet tinongpal sha.

⁷ Jet wára pay i piskaw, nem aliwén eshakil. Nan-iyaman mowan si Jesus son Apo Shiyos, jet inkowan to so ira nonta too to ey iwáris sha ngo sota piskaw so ira nonta eshakil la totoo.

⁸ Jet emin ira sota eshakil la totoo, engan ira et napsel iren emin. Jet idi naksheng ira, sina-nop sha sota ebay-an ja eg sha kinan et ondaw wa piton basket.

⁹ Sota engan nontan, ondaw wa epat ta dibo.

Jet nontan ma, inpa-ekad to ira sota totoo.

¹⁰ Jet si Jesus, pati sota ira too to, ira nandogan shagos nodta bangka jet dimaw ired ma dogad ja sakop ni Dalmanota.

Piyan nen Jesus ja eg onoran nonta ira too to sota ira Parisiyo

¹¹ Sota ira Parisiyo, dimaw ira so nen Jesus ja sha peshasen ni dedamsis sha. Isonga kowan sha son si-kato ey mandeka ni milagro ja kowan sha ey asanan sha so no podnon inbetkag ali nen Apo Shiyos.

¹² Nem si Jesus, ngimed-as sa pasiya, asan toka ikowan ey, “Apay nga sajay ira maramen too niman ket shaka pan-ibaga sota kowan sha

ey asanan sha so no si Apo Shiyos i podnon engibetkag son si-kak ali? Agpayso iya ikowan ko son si-kayo. Enshiy milagro ja en maypa-sas son si-kayo niman.”

¹³ Sajay i kowan nen Jesus asan toka ira ilekjas. Nandogan mowan shi bangka et dima-jat iren ondaw nodta shemang ni baybay.

¹⁴ Nem dinibkan sha gayam ja engita-jon ni balon sha. Say intakin sha bengat nodta bangka ket sakey ya boknol la tinapay.

¹⁵ Jet si Jesus, binidin to ira ja kowan to ey, “Tanshaaniyo sota singa para debag ni tinapay ja wára so nonta ira Parisiyo tan so nen Ari Hirodis.”

¹⁶ Nem sota ira too nen Jesus, ireka mansosongbat bengat, ja kowan sha ey, “Dinibkan tayo eshan ja engita-jon ni balon tayon tinapay.”

¹⁷ Si Jesus, indasin to ey sotan i shaka pansosongbati et kowan to son si-kara ey, “Apay nga kayoka mansosongbat ni ka-enshi ni balon jo? Apay eg jo pay laeng ewatan aya? Apay etangken pay laeng i nemnem jo?

¹⁸ Itan i matejo; apay nga eg jo asen? Itan i tangidayo; apay eg kayo aya onteneng? Dinibkan jo aya?

¹⁹ Nonta inosal ko sota dimen boknol la tinapay ni inpamakan ko nonta ira dimen dibon too, pi-gen baskit ja nankepno i sina-nop jo ja binay-an sha?”

Kowan sha ey, “Sawal ni showa.”

²⁰ Kowan pay nen Jesus ey, “Jet nonta inosal ko sota piton boknol la tinapay ni inpamakan

ko nonta ira epat ta dibon too, pigen baskit ja nankepno i sina-nop jo ja binay-an sha?”

Kowan sha ey, “Pito.”

²¹ Jet kowan nen Jesus ey, “Jet eg jo pay laeng ewatan?”

Inpamapteng nen Jesus i toon ekorab shi Bitsaida

²² Mimotok ira maled Bitsaida et shiman, in-ilaw ni tood man i toon ekorab son Jesus jet inshawat sha son Jesus ey pishaten to kono say ma-kal sota korab to.

²³ Shinewat nen Jesus sota ekorab et inshalan to led naydasin nodtan na kawad-an ni totoo. Tinopsha-an toy mata nonta ekorab, asan toka isakpal i takday to so nonta ekorab. Jet inbag-an to nem waray toka ishemang.

²⁴ Idi bikaten nonta ekorab i mateto, kowan to ey, “Owen — waray naka ishemang nga too, nem singa kiyew i naka pengesas son si-kara. Nem eman-ekad.”

²⁵ Pinishat nen Jesus mowan i mata nonta ekorab, jet idi onmorag sota ekorab, na-kal la pasiya sota korab to et mapoot i toka pengesas.

²⁶ Jet inpa-ekad nen Jesus sota istay ekorab, ja kowan to ey, “Eg ka nin on-oli shima edapo-an ta di.”

Inbolikas nen Pedro ey si Jesus i inbetkag ali nen Apo Shiyos

²⁷ Si Jesus tan sota ira too to, dimaw ira nodta sakop ni Sisaria Pilipos, jet idi wara ired shalan, inbag-an to ira sota too to, ja kowan to

ey, “Ngarantoy kaikowan ira ni totoo ni may-pangkep son si-kak? Eg sha aya pantatabalan nem sipa-ak?”

²⁸ Jet sota ira too to, simongbat ira ja kowan sha ey, “Eg met nan-i-inges i shaka ikowan. Say kowan ni eshom, si-kam kono si Juan ja para bonjag ja etey da, nem sota ira eshom, kowan sha ey si-kam si Elias ono sakey so nonta ira eshom ma para padto nonta bayag da ja nan-ongal mowan ali.”

²⁹ Jet si Jesus, inbag-an to mowan ira ja kowan to ey, “Jet si-kayo ngay? Ngaranto ngoy kowan jo ni maypangkep son si-kak?”

Simongbat si Pedro ja kowan to ey, “Si-kam sota inpadtora nonta bayag da ey ibetkag ali nen Apo Shiyos ja mengisedakan.”

³⁰ Jet si Jesus, binidin to iren pasiya ey eg sha ikokowan ni angken sipa ey si-kato sota naypadto nonta bayag da ja mengisedakan.

Pan-idawag nen Jesus sota pandikat to di

³¹ Jet manshoki ma nontan, kaipinpinshowa nen Jesus so nonta ira too to ey siyen si-kato sota naypadton Anak ni Too, nem mesepol met laeng nga manda-kam ni eshakel la digat, ta sota ira pangolo ni Hodiyo, tan sota ira apo ni papashi, tan mamaistoro ni dinteg, bedawen sha kono, jet anongosto ma ey bono-en sha. Nem kowan to ey no maykatdon akew, manbiyag mowan.

³² Indiritso ton inkowan na emin ira jay; enshiy polibas to.

Jet nontan ma, si Pedro, to indasin si Jesus et inseg-ang to tep inkowan to ey mebono.

³³ Nem nanposipos si Jesus et insi-ning to iray too to, asan toka ngo iseg-ang si Pedro, ja kowan to ey, “Betawimak, si-kam ma Satanas! Say nemnem mo, aliwén sota plano ja nemnem nen Apo Shiyos, no diket sota etoo-an na nemnem.”

Edigat i pengonod son Jesus, nem epateg i mekon-od ali shi ka-onoran

³⁴ Tina-wál to ira sota eshakil la totoo, pati sota ira too to, jet inkowan to son si-kara ey, “No sipay makapiyan ja on-onod son si-kak ja manbedin ni took ni olay, mesepol la si-kak bengat i nemnemnemen to, ja ibiyang ton emin i kompormi. Tan mesepol la enosan to pay ya angken maybebaing ono mebono ja inges to sota toon emasan ni koros ja kaydansa-an to shorog.

³⁵ Sota toon entapi toy biyag to ja kowan to ey ensikshal la metey maypangkep son si-kak, si-kato et ngo mowan i mepokaw i biyag to. Nem sota toon eg to kawanan i bakdang to maypangkep son si-kak, ono sota mapteng nga shamag ja maypangkep son si-kak, si-kato et ngo mowan i i-aknan nen Apo Shiyos ni biyag ja enshiy to engintegan.

³⁶ No kaspangarigan ey kinokowa ni sakey ya too i emin na wáred ja dobong, enshiy silbi nontan na kinokowa to, no eg to kon-oren sota biyag ja enshiy to engintegan.

³⁷ Enshiy silbi nontan na inpasing to, ta sotan na biyag i epateg ga pasiya, ja enshiy to kaysa-datan na angken nganto.

³⁸ No sota toon embaing nga mengikowan ey si-kato ket took, ono embaing nga mengikowan

ni esel ko no maydaok shi totoon eg mannemnem so nen Apo Shiyos tan toon mabesol, ibaing ko ngo sotan na too no ondawak alin mantoshay. Agpayson si-kak sota kowan nonta para padto nonta bayag da ey Anak ni Too, jet sotan alin idaw ko mowan, say kasesaad ko, inges ko met laeng i kasesaad nen Apo Shiyos. Tan may-odop ali sota ira anghil to son si-kak.”

9

¹ Jet kowan pay nen Jesus ey, “Agpayson waray eshom son si-kayod jay ja eg metey ingkatod asen sha sota pantoshayan nen Apo Shiyos, jet ebadeg ga pasiya aliy panakabalin nen Apo Shiyos no timpo alin ketongpalan to.”

Nanbalin ni emenenili i bakdang nen Jesus nodta shontog

² Idi waray enem ma akew ja edabas da ni engikowanan nen Jesus niyay, inodop to si Pedro, si Santiago, tan si Juan, jet timiyed ira ni a-abos sha shima shontog ga ekayang. Jet idi mimotok ira nodtan, inon-an shen nanbaliw i itsora to ja emenenili.

³ Jet sota baro to, emandining nga pasiya, tan empotin pasiya, ja enshiy to kay-ingesan na kapoti-an na baro shiya dobong ja inpapoti ni too.

⁴ Jet nanpa-sas ma si Elias nen Moises, jet ireka mekitabtabal so nen Jesus.

⁵ Jet si Pedro, kowan to son Jesus ey, “Apo, mapteng i kawasha tayod jay. Kosto gayam nem mengemag kami ni tedon kampod jay: sota sakey

para son si-kam, sota sakey para son Moises, tan sota sakey para so nen Elias.”

⁶ (Sajay i inkowan nen Pedro tep eg to am-amtay ikowan to; ta epaladoy takot ira nonta tedon too nen Jesus ja inodop to.)

⁷ Jet nontan, dimespag aliy kolpot jet dinikopan nonta kolpot ira. Jet waray esel ja edapo nodtan na kolpot ja intenengan sha, ja kowan to ey, “Sajay i Anak ko jet ensemek ko. Isonga patiyon emin i ikowan to.”

⁸ Jet idi ireka manmodimodi, enshi met i eshom ma wara nodtan, no diket si Jesus bengat i kait sha nodta shontog.

⁹ Jet idi ireka manshedong ja edapo nodta shontog, binidin nen Jesus ira sotan na tedon too to ey eg sha ikokowan so ni eshom, ja angken sipa, sota inon-an sha nonta wara ired ma shontog. Jet inkowan to ey asan shaka ikowan iyay nem man-ongal ma ali sota kowan sha ey Anak ni Too.

¹⁰ Jet sotan iren too to, pinatira iyay ya inbilin nen Jesus, nem shaka met laeng tabtabala shorog nem ngarantoy piyan nen Jesus ja a-selen nonta inkowan ton “pan-ongal ma ali”.

¹¹ Jet sota ira too to, inkowan sha son Jesus ey, “Say toro nonta mamaistoro ni dinteg, kowan sha ey mepangdo alis Elias asan ma sota nay-padto nonta bayag da ey ibetkag ali nen Apo Shiyos ja mengisedakan. Jet ngantoy ya sajay?”

¹² Simongbat si Jesus, ja kowan to ey, “Owen, agpayso ja si Elias nin aliy mepangdo jet si-katoy mengi-odi nonta kimapoy ya pamati ni totoo say onkedsang ma. Nem ima pay i sakey ya padto

maypangkep nonta kowan sha ey Anak ni Too: mesepol konon da-kaman toy eshakil la digat tan dedamsis ni totoo.

¹³ Nem iyay i ikowan ko son si-kayo maypangkep mowan nonta inbaga jo. Si Elias, naksheng alin dimaw, jet dingkara son si-kato i kompormin kedsel la ninemnem sha. Tep sotan met laeng i naypadto nonta bayag da ja mepesamak son si-kato.”

Inpamapteng nen Jesus sota nga-ngen mankelshas ja waray dimonyon pimeket son si-kato

¹⁴ Idi mimotok shi Jesus ja edapo ali nodta shontog, simbira sota ira too ton tinaynan sha, ja dinikmot gayam ni eshakil la totoo. Tan waray mamaistoro ni dinteg ja emekisongsongbat son si-kara.

¹⁵ Dimibag ira sota eshakil la too ni in-asis sha so nen Jesus ja emanmotok. Nan-o-odop da iren en mengaspol son Jesus, jet inkowan sha ey ebadeg i imdeng sha ni inmotok to.

¹⁶ Inbag-an nen Jesus ira, ja kowan to ey, “Ngantoy joka pansosongbati nonta ekay?”

¹⁷ Imesel may sakey ya toon wara nodtan na karakdan, ja kowan to ey, “Apo, in-ilaw ko ali son si-kam iya anak kon daki, ta waray dimonyon kaonsabi son si-kato ni olay et si-katoy kabol la eg to pan-a-selan.

¹⁸ No onsabi sota dimonyo, toka bigla-en to-dangen shi bo-day, jet eman-o-osab i bongot to, ey toka panngedetngat i sangi to, tan kaonkenkenteg. Inkowan ko so nita toom ey

pebtik sha sota dimonyo, nem eg sha met bi-naalan.”

¹⁹ Jet si Jesus, kowan to ey, “Enshiy pamatiyo eshan! Ebayagak met shiyay ja eman-enos son si-kayo, nem eg jo pay laeng pati-en i panakabalin nen Apo Shiyos! Ilaw jo did jay son si-kak sota nga-nga.”

²⁰ In-ilaw sha sota nga-nga son Jesus et idi inon-an nonta dimonyon pimeket nodta nga-nga si Jesus, inpankenkenteg to sota nga-nga. Jet eto-dang sota nga-nga, ja emanpodipodig, ey eman-o-osab i bongot to.

²¹ Inbag-an nen Jesus sota ama ni nga-nga, ja kowan to ey, “Pigan i nanshogi-an niyay?”

Simongbat sota ameto, ja kowan to ey, “Nanshogi nonta ka-ootik to pay laeng.

²² Eminpigen kepeshasa nonta dimonyo ja bono-en: toka ikespig shi apoy ono shi shanom. Nem no baalan mo iyay, kaasi-i jokami et tolongi jokami.”

²³ Kowan nen Jesus ey, “Singa kowan mo ey ekak emo baalan? Sota toon ememati son Apo Shiyos, kabedinan ton emin i angken nganto.”

²⁴ Sotan ma ey inkedsang nonta ama ni nga-nga i esel to, ja kowan to ey, “Naka memati, nem tolongimak shi naka pankodangi!”

²⁵ Idi inon-an nen Jesus ja emankai-sop sota eshakil la totoo son si-kato, sinelkag to sota dimonyo, ja kowan to ey, “Si-kam ma dimonyo ja kabol la eg pantetnengan tan eg pan-a-selan niya nga-nga, ikowan ko son si-kam, betik ked ta nga-nga, jet kareka ma on-oli-oli son si-kato!”

²⁶ Kimeljaw sota dimonyo, asan toka pankenkenteg mowan sota nga-nga, asan kabetik mala. Jet singa etey i inpangidmang nonta totoo so nonta nga-nga. Isonga kowan ni karakdan son si-kara ey, “Ayshi — etey da.”

²⁷ Nem shinewat nen Jesus et inpa-tan to. Jet imetan nga agpayso sota nga-nga.

²⁸ Idi onsekep da si Jesus nodta baley, ey abos sha mala shi naydaem, inbag-an ira nonta too to, ja kowan sha ey, “Apay nga eg mi binaan na inpabtik nontan sota dimonyo so nontan na nga-nga?”

²⁹ Kowan to son si-kara ey, “Eg mebedin na pebtik ira jay ya kalasin dimonyo nem eg kita nin manshewat ni tolong so nen Apo Shiyos.”

Inpa-amta mowan nen Jesus sota ketey to di

³⁰ Indekjas sha ma sotan na dogad ja kawad-an sha, jet nanshalan ira shi Galilia. Eg piyan nen Jesus ja amta-an ni totood man ey ondabas ira,

³¹ tep waray toka pan-itoro nontan so nonta ira too to, ja kowan to ey, “Si-kak sota kowan ni para padto nonta bayag da ey Anak ni Too, nem may-ewatak so nonta ira toon makakontra son si-kak, jet si-karay memono son si-kak. Nem no maykatdon akew ni ibono sha-ak so, manbiyagak met laeng.”

³² Nem eg sha inewatan iyay ya kowan nen Jesus. Piyan shen ibaga nem ngarantoy olog niyay ya inkowan to, nem embaing iren mengibeka.

Sota mengibeba ni bakdang to, si-kato et ngo mowan i mayngeto

³³ Idi mimotok ira shi Kapirnaom, dimaw ira shima baley ya shaka pan-iyani. Jet inbag-an nen Jesus sota ira too to, ja kowan to ey, “Ngaran nonta joka pantabtabala shi shalan ali?”

³⁴ Nem eg sha sinongbatan, tep say tabtabal sha ni shaka pan-ekad ket ireka mansosongbat no sipa son si-kara i kangeto-an.

³⁵ Timongaw si Jesus et tina-wal to ira sota sampolo tan showa ja apostol to, jet kowan to son si-kara ey, “No sipay too ja piyan ton si-katoy mandesin ni shayaw, mesepol la panbedin toy bakdang to ja kabeba-an tan man-obda ni pan-sigshan ni kait to.”

³⁶ Jet ena-wal si Jesus ni sakey ya nga-nga jet inpaledjat to nodta nankinaw-an ira nonta too to, jet idi inakwal to sota nga-nga, kowan to so nonta too to ey,

³⁷ “No sipa ken too ja mapteng i pesing mo so ni inges niyay ya nga-nga maypangkep ni semek mo son si-kak, si-kak met laeng i tinoshong nonta inpasing mo. Jet no si-kak i pesingan mo so ni mapteng, say toshongen nonta dingkam, si Amak ja engibetkag son si-kak ali.”

“Sota aliwen makakontra son si-katejo, si-katoy kait tayo”

³⁸ Kowan nen Juan ey, “Apo, waray inon-an min too ja emengosal ni ngaran mo say onbetik iray dimonyo ja pimeket shi totoo. Jet inpasalsheng mi tep aliwen kait tayo.”

³⁹ Nem kowan nen Jesus ey, “Karejo iparit i i-osal to so ni ngaran ko. Ta no i-esel towak ni sakey ya too, ey metongpal i milagron dag-en

to, enshiy pesing ton onsomang son si-kak nem sakey ya akew.

⁴⁰ No sipa sota eg makakontra son si-katejo, si-katoy kait tayo.

⁴¹ “Agpayso iyay ya ikowan ko son si-kayo. Sota toon mengi-kan son si-kayo ni angken santasen shanom ja inomen jo, ta amta to ey si-kak i makatoo son si-kayo, sotan na toon mengi-kan ni shanom, sigoradon waray kon-oren to ali ja i-akan nen Apo Shiyos son si-kato.

⁴² “Nem sota istay mengi-kan ni panbesolan ira niya nankebaben emati son si-kak, say panmaptengan nontan na too ket ma-ono-an koma ni ebadeg ga bato et en mayteb-ok shima debeng nga baybay. Sotan i panmaptengan to ta engka-jas sotan na keshosa to nem say sota penosa nen Apo Shiyos son si-kato ja pengikesho to no istay itoloy ton panbesol sota kait to.

⁴³ “Isonga no bilang ey sota sakey ya takday mo ket si-katoy mengi-kan ni panbesolan mo, potol mo. Ta no pa-onong mo, si-katoy kaypedawan mod impiyarno ja kawad-an ni apoy ya eg ma-ma-shep ingkatod ingka. Mapmapteng sota ka-enshi ni sakey ya takday mo, no sotan i kesalbaran mo.

⁴⁴ (Shima impiyarno, eg metmetey sota ira bigis ja emengan so ni totood man, tan eg ma-ma-shep sota apoy.)

⁴⁵ Jet no sota sakey ya sedim ket si-katoy mengi-kan ni panbesolan mo, potol mo. Ta no pa-onong mo, si-katoy kayteknalan mod impiyarno. Mapmapteng sota ka-enshi ni sakey ya sedim, no sotan i kesalbaran mo.

⁴⁶ (Shima impiyarno, eg metmetey sota ira bigis ja emengan so ni totood man, tan eg ma-ma-shep sota apoy.)

⁴⁷ Kasta met sota sakey ya matam: no si-katoy mengi-kan ni panbesolan mo, okit mo et ibong mo. Ta no pa-onong mo, si-katoy kayteknalan mod impiyarno. Mapmapteng sota ka-enshi ni sakey ya matam, no si-katoy kayda-kaman mod pantoshayan nen Apo Shiyos.

⁴⁸ Shima impiyarno, eg metmetey sota ira bigis ja emengan so ni totood man, tan eg ma-ma-shep sota apoy.

⁴⁹ “Ta emin na totoo, ma-esinan ira ni apoy.

⁵⁰ “Isonga iyay i ibanshaan ko son si-kayo. Say asin, mapteng. Nem no ma-enshiy pait to, ja entemnay ma, eg jo mebedin na imowan i pait to.

“Epateg ga pasiya i pan-i-inawatan jon took; isonga mesepol la ma-esinan kayo ni olay.”

10

Sota inpangitoro nen Jesus maypangkep ni pengisi-jan ni asewa

¹ Indekjas nen Jesus i Kapirnaom et dimaw nodta sakop ni Jodia ja wared baliw ni ebadeg ga pa-dok ja kowan sha ey Jordan. Jet nontan, eshakil mowan na pasiya i totoo ja esa-nop son si-kato, jet intod-an to ira, tep si-katoy toka pesing ni olay.

² Nontan, wara ngo aliy dimaw son si-kato ja Parisiyo, jet kowan sha ni dedamsis sha ey peshasen sha si Jesus. Isonga kowan sha ey, “Ngantoy moka pengi-odog ni dinteg tayon

Hodiyos maypangkep ni pengisi-jan ni asewa? Bolos aya i pengisi-jan ni daki so ni asewa to?"

³ Simongbat si Jesus, ja kowan to ey, "Ngaran ni inbilin nen Moises son si-kayo ja koston dag-en jo?"

⁴ Kowan sha ey, "Intolok nen Moises i pengisi-jan ni daki so ni asewa to. Basta i-amagan tos asewa to ni solat ja isepa to son si-kato asan toka tayni."

⁵ Nem si Jesus, kowan to son si-kara ey, "Say kabol la sotan i insolat nen Moises, etangken i nemnem jo.

⁶ Nem aliwen satan nonta pinalsowa nen Apo Shiyos i too, tep say naysolat nonta bayag da maypangkep niyay, kowan to ey, 'Manshoki nonta pilmiro, pinalsowa nen Apo Shiyos i daki tan bii.'

⁷ Jet inbilin to, ja kowan to ey, 'Ma-alsa sota daki so nen ameto tan ineto et may-a-shom so nen asewa to.

⁸ Jet sota showen bakdang, may-eshig ma ey nansaksakey.' Sajay i bilin nen Apo Shiyos.

⁹ Inpansaksakey nen Apo Shiyos i san-asewa; isonga enshiy nebeng ni toon mengisi-jan ni asewa to." Kowan nen Jesus.

¹⁰ Idi simekep da si Jesus nodta baley, inbag-an mowan ira nonta too to ni maypangkep ni si-jan.

¹¹ Jet simongbat si Jesus, ja kowan to ey, "No sipay daki ja mengisi-jan ni asewa to, ey mengesawa mowan ni apil la bii, nanbasol nodta epangdon asewa to ja inges to sota emii.

¹² Tan kasta met sota bii: no isi-jan to sota asewa to ngon daki, ey mengesawa mowan ni

apil la daki, nanbasol met laeng ja inges to sota ekileki.”

Inpalobos nen Jesus ja ondaw ira di sota a-anak son si-kato

¹³ Sota eshom iren too, indaw shay angken na nga-nga son Jesus, ta kowan sha ey say pishaten ton bindisiyonan ira. Nem sota ira too nen Jesus, inseg-ang sha ira sota engidaw ali so nonta a-anak.

¹⁴ Nem idi inon-an nen Jesus iyay, ngaaw i dekna to, jet inkowan to son si-kara ey, “Bay-bay-iyo ira di sota a-anak ja ondaw ali son si-kak; eg jo iparit. Tep inges iren jay ya a-anak bengat ja ekombaba i mayda-kam shi pantoshayan nen Apo Shiyos.

¹⁵ Podno iya ikowan ko son si-kayo. No eg kayo mengewat ni pantoshayan nen Apo Shiyos ja inges toy kepengewat ni a-anak, eg kayo mayda-kam ja onsekep shi pantoshayan nen Apo Shiyos.” Kowan nen Jesus.

¹⁶ Jet inakwal nen Jesus sota ira a-anak, jet binindisiyonan to ira ni insakpalaan to so ni takday to.

Si Jesus tan sota baknang

¹⁷ Idi emanda-jat si Jesus ja ondaw shi dawán to, nanbetik aliy sakey ya too ja nantalimokod shi sango-an nen Jesus, ja kowan to ey, “Maistoro, mapteng ken too. Isonga ikowan mo ga no ngarantoy dag-en ko say mewad-anak ni biyag ja enshiy to engintegan.”

¹⁸ Simongbat si Jesus ja kowan to ey, “Ngantoy mosoka ikowani so ey maptengak? Abos nen Apo Shiyos ja mapteng.

¹⁹ Nem no maypangkep nonta biyag ja enshiy to engintegan ja inbagam, amtam sota ira bilin nen Apo Shiyos: ‘kareka memono, kareka memii ono mekileki, kareka mengibot, aliwen mo ba-ngaten ja man-a-sel ni aliwen kosto, kareka menaol ni kait mo; tan shayaw mos inam tan amam.’ ”

²⁰ Kowan nonta too ey, “Apo, nontan pay laeng nga-nga-ak ingkato niman, inonod kon emin itan na bilin nen Apo Shiyos.”

²¹ Jet si Jesus, insi-ning to sota too jet nasmekan so nen si-kato, jet kowan to ey, “Wara pay laeng i sakey ya kolang mo. Daw ka, mo ilekon emin sota kokowam et sota dako to, iweshis mo so nonta ira nankebiteg. No sajay i pesing mo, maytedo shi dangit i kabaknang mo. Jet no meksheng nga sotan i pesing mo, kay-eshom ka di so ira niya took!”

²² Nem idi intenengan nonta too iyay ya inkowan nen Jesus, na-josan na pasiya jet nantik ja ensakit i nemnem to, tep toka tepi-a i kabaknang ton pasiya.

²³ Jet si Jesus, inpan-eta-etan toy mateto so ira nonta too to et kowan to son si-kara ey, “Edigat ja onsekep i baknang shi pantoshayan nen Apo Shiyos!”

²⁴ Nasshaaw ira sota too to ni inkowanan to so niyay. Nem inpinshowa nen Jesus mowan, ja kowan to ey, “Si-kayon naka ikarin singa annak ko, emandikat ta kenshat i angken sipen too ja

onsekep shi pantoshayan nen Apo Shiyos — nem mas edigdigat pay so ni baknang.

²⁵ Sota animal la kowan sha ey camel, no kas-anoy kalikat to ja on-osok shi eboto ni shakom, mas edigdigat pay ya onsekep i bebaknang shi pantoshayan nen Apo Shiyos!”

²⁶ Jet nasshaaw iren pasiya jet kowan sha son Jesus ey, “No kasta, enshi ngarod i maysedakan?”

²⁷ Simongbat si Jesus ja kowan to ey, “Agpayson eg kabaalan ni toon mengisedakan ni bakdang to shorog, nem mebedinan nen Apo Shiyos. Tep si Apo Shiyos, kabaalan ton emin.”

²⁸ Idi inkowan nen Jesus iyay, imesel ma si Pedro, ja kowan to ey, “Karam ngo dibdibkan ey si-kami ket indekjas min emin i kokowa mi nonta nanbalinan mi ni toom!”

²⁹ Jet si Jesus, kowan to ey, “Podno iya ikowan ko son si-kayo. No sipay engilekjas ni baleyo to, a-aki to, annak to, bo-day to, ono sota maka-anak son si-kato, kabol ni inpamati to ni bilin ko ono kabol ni pengitosho to so nonta mapteng nga shamag maypangkep son si-kak,

³⁰ ebadbadeg ga pasiya i ewaten to: angken niman na kawasha tod ja dobong, manbedin ni sandasos i baleyo to, a-aki to, ineto, annak to, bo-day to. Tan no man-onod alin akew, kon-oren to pay i biyag ja enshiy to engintegan. Nem pedigaten ngoreshan ni toon eg makakosto son si-kak ni saja maramen biyag niman.

³¹ Nem eshakel ira sota kowan sha ey si-karay mandesin i ewaten sha, ja kina-agpayso to ket ootik kari. Wara et ngo mowan i kowan ni

karakdan ey ootik i ewaten sha, nem eshakil kari.” Kowan nen Jesus.

Sota maykatdon engikowanan nen Jesus ni maypangkep ni ketey to

³² Idi nonta eman-ekad si Jesus tan sota ira too to, ja ondaw shi Jerusalem, epangdo ni ootik si Jesus. Jet sota ira kaon-onod son si-kato, naykel-ewan ira; entakot ira tep ireka mantoshong shi Jerusalem. Inpata-nil nen Jesus ira sota sampolo tan showa ja apostol to et a-abos sha ma. Jet insigod ton inkowan son si-kara i mepesamak ali son si-kato,

³³ ja kowan to ey, “Itnengi jo iya ikowan ko son si-kayo. Agpayson si-kak sota kowan ira nonta para padto nonta bayag da ey Anak ni Too. Nem no onmotok kitod Jerusalem, may-ewatak ma so nonta ira apo ni papashi tan mamaistoro ni dinteg ja makakontra son si-kak. Jet sotan may timpo ja pengikowanan sha ey mebono-ak koma. I-awat sha-ak so nonta ira too ja aliwen kait tayon Hodyos.

³⁴ Jet si-karay memebaing son si-kak; toptop-sha-an sha-ak pay et sepsepaten sha-ak, asan sha-ak ma bono-a. Nem no maykatdon akew, pan-ongal towak met laeng nen Apo Shiyos.”

Inshawat nen Santiago nen Juan i pekitoshay sha son Jesus

³⁵ Jet nontan, si Santiago nen Juan, ja san-agin anak nen Sibidi, dimaw ira son Jesus, jet inkowan sha son si-kato ey, “Apo, iyay i kekshawen mi son si-kam.”

³⁶ Jet si Jesus, kowan to son si-kara ey, “Ngan-toy piyan jon dag-en ko para son si-kayo?”

³⁷ Kowan sha ey, “No mantoshay ka di, piyan min mekitoshay ngo son si-kam. Itodok mokami ja ontongaw i sakey shi petek ni kanawan mo et sota sakey, ontongaw shi petek ni kanigid mo.”

³⁸ Kowan nen Jesus ey, “Joka ba-ngatay baga ey eg jo nin nemnemen. Wara aliy tasen napno ni digat jet mesepol la nak inomen. Kabaalan jo ayen mengenos ja meki-inom nontan? Wara aliy bonjag ja onsabi son si-kak ja epaladon pasiya; kabaalan jo ayen mengenos ja mekibonjag son si-kak?”

³⁹ Simongbat ira ja kowan sha ey, “Mebedin na enosan mi.”

Jet kowan ma nen Jesus ey, “Agpayson meki-ila-kam kayo ni da-kaman ko di.

⁴⁰ Nem sota itongaw jo shi petek ni kanawan ko, tan kanigid ko, aliwen si-kak i mengigsheng so. Sajay, para so nonta ira sigod ja insagana-an so nen Amak.”

⁴¹ Idi intenengan ira nonta kait shen sampolo ja apostol nen Jesus iyay ya keshaw, ngaaw i deknara son si-kara.

⁴² Nem si Jesus, tina-wal to ira jet kowan to son si-kara ey, “Amtayo met i kepesing ira nonta toon emaybidang ey toray ni kompormin ili, tan sota eshom ma toon nankengatoy saad sha. Shaka ipakat i saad sha, ni shaka pengitoshay met laeng so ni sinekohan sha.

⁴³ Nem no si-kayo, aliwen inges nontan i pesing jo so ni sakey tan sakey son si-kayo. Sota kowan to ey si-katoy kangeto-an son si-kayo, mesepol la

si-kato et ngo mowan i mengibeba ni bakdang ton man-obda ni pansigshan ni kait to.

⁴⁴ Jet sota piyan ton si-katoy mandesin son si-kayo, mesepol la panbedin toy bakdang to ni baga-en jon emin.

⁴⁵ Ta kinapodno to, angken si-kak ja naypadto nonta bayag da ey Anak ni Too, ekak dimaw ali ja pansilbi-an ni karakdan, no diket dimawak ali say mansilbi-ak son si-kara. Tan say sakey pay ya dinawan ko di, say itolok koy bakdang kon metey, tep si-katoy kaysedakanan ni eshakil la totoo.”

Inpan-asas nen Jesus i toon ekorab shi Jiriko

⁴⁶ Mimotok ira shi Jiriko, jet idi nonta shaka pan-idekjas i Jiriko, eshakil la pasiya sota toton imonod son si-kato tan sota ira too to. Jet nodta kalsara, waray toon timongaw nodta naykilig ja emankekkekshaw. Say ngaran to, si Bartimeo ja anak nen Timeo.

⁴⁷ Idi intenengan to sota kowan ni totoo ey si Jesus ja i-Nasarit i ondabas ali, inkedsang toy esel to, ja kowan to ey, “Jesus! Kaasi-imak, si-kam ma mengibengon son Ari David nonta bayag da!”

⁴⁸ Nem sinelkag nonta eshakil la too, ja kowan sha ey, “Eka-eket ka!”

Nem mina-ma to et ja inkedsang toy keljaw to, ja kowan to mowan ey, “Kaasi-imak, si-kam ma mengibengon son Ari David nonta bayag da!”

⁴⁹ Kimi-neng si Jesus et kowan to ey, “Tawal jo alid jay.”

Jet tina-wal sha sota ekorab, ja kowan sha ey, “Pan-imdeng ka, ta tokaka panta-wala. Etan ka.”

⁵⁰ Inwálsis nonta ekorab sota insala-wáki ton baro to et dinektit toy etan, jet dimaw so nen Jesus.

⁵¹ Jet inbag-an nen Jesus, ja kowan to ey, “Ngarantoy piyan mon itolong ko son si-kam?”

Kowan nonta ekorab ey, “Apo, pan-asas mowak, say man-esasak mowan.”

⁵² Kowan ma nen Jesus son si-kato ey, “Sota pamatim son si-kak, si-katoy kabol la pan-esasan mo. Angken on-akad ka ma.”

Jet nontan, nan-asas sa shagos sota ekorab, jet nay-eshom ma son Jesus ded kalsara.

11

Edadsak i totoo nonta mimotok si Jesus shi Jerusalem

¹ Nonta nay-esop ma shi Jesus shi Jerusalem ja wára ira shima dogad ja kowan sha ey Bitpag tan Bitania, ja osshong ni shontog ga kowan sha ey Olibas, engibetkag si Jesus ni showen too ton mepangdo,

² jet inbilin to son si-kara ey, “Daw kayod ma dogad ja naysongbob et no onmotok kayo, wáren shagos i asen jon kilaw ni animal la donkey, ja nappagod. Sajay ya kilaw, eg pay laeng ekabkabajo-an. Okasiyo et alejo did jay.

³ No wáray mengibeka son si-kayo no ngantoy joka pan-okasi so, ikowan jo ey, ‘Si Apo Jesus, mesepol to jet pai-odi to met laeng alin shagos.’ Satan da i ikowan jo son si-kara.”

⁴ Jet siya, dimaw ira sota shadwá et simbira nga agpayso sota donkey ja nappagod shi kalsara

ja nay-askang shi sakepan ni sakey ya baley, jet inokasan sha.

⁵ Jet naytompong nga wáray too nodtan et kowan sha so nonta shadwén too nen Jesus ey, “Ngantoy? Joka pan-okasi ita kilaw?”

⁶ Jet insongbat sha sota inbilin nen Jesus ey isongbat sha, jet intolok ira nonta engibeka son si-kara i i-ala sha so nonta kilaw.

⁷ Jet indaw sha sota kilaw son Jesus et sota ta-kep ni baro sha, in-ap-ap sha nodta beneg ni donkey et nankabajo si Jesus.

⁸ Sota ira ngo eshakil la totoo, in-ap-ap sha ngoy baro sha nodta kalsaren pansalnan nen Jesus. Sota ira eshom, ira engala ngo ni emolong nga panga ni kadasan et in-ap-ap sha nodta kalsara.

⁹ Sota ira totoo ja epangdo ey si Jesus, tan sota ira na-onod, ireka onkaneljaw, ja kowan sha ey, “Salamat son Apo Shiyos tep inbetkag to di iya toon mengisedakan! Bindisiyonan to koma!

¹⁰ Iyay ali sota toon naypadto nonta bayag da ey mengibengon ni inpantoray nen Ari David ja apo tayo da! Bindisiyonan nen Apo Shiyos i pantoshay to di! Salamat son Apo Shiyos ja Kangeto-an!”

¹¹ Idi mimotok si Jesus shi Jerusalem, simekep nodta Timplo, jet idi naksheng nga inon-an ton emin i wáred bo-dayan ni Timplo, nan-o-odop si Jesus tan sota ira sampolo tan showen apostol to, jet dimaw ired Bitania, tep edabi ma.

Sota inpasing nen Jesus so nonta kadasan na eg ondames

¹² Idi agsapa, ja eman-ekad si Jesus ja edapo ali shi Bitania, naytompong nga na-agang nontan.

¹³ Inon-an tod naybetaw i kadasan na emolong. Dimaw say to on-an nem wáray sepolen ton dames to, nem idi onsabi, enshi gayam i dames to; bolong bengat i wára. Tep aliwén timpon idames to.

¹⁴ Jet kowan to ey, “Si-kam ma kadasan, manipod niman ingkatod ingka, polos sa enshiy en namtan ni too ja dames mo!” Jet intenengan ira nonta too to iyay ya inkowan to.

Shinagshag nen Jesus ira sota emandeko nodta Timplo

¹⁵ Nay-oli ired Jerusalem et dimaw mowan si Jesus nodta Timplo. Jet emin ira sota emandeko nodtan, tan emenongkal, shinagshag to iren inpabo-day. Jet tino-to-dang to pay ira sota damisaan ira nonta emena-dat ni pilak, tan sota tongawan ira nonta emandeko ni kalopati.

¹⁶ Jet eg to intolok i pengegshi ni kompormin dako shi bo-dayan ni Timplo.

¹⁷ Jet intod-an to ira ja kowan to ey, “Say kowan nonta esel nen Apo Shiyos ja naysolat nonta bayag da, kowan to ey sajay ya baley nen Apo Shiyos, nayngadnan ey si-katoy panshewatan ni emin na totoo son si-kato, nem inpanbalin jo et ni singa amotan ni tolisan!”

¹⁸ Shinemag ira nonta apo ni papashi ni Hodiyo tan mamaistoro ni dinteg ni Hodiyo iyay et pineshas shen enganap ni pesing shen memono son Jesus, tep ireka manshanag ey si Jesus i kabol ni eg sha ma so ira pati-an ni

karakdan kabol ni na-awisan sha nonta toka pan-itoro.

¹⁹ Idi shanshani men medebi, si Jesus tan sota ira too to, bintikan shay siyodad ni Jerusalem.

Say kasapolan na pasiya, sota pamati son Apo Shiyos

²⁰ Idi nonta agsapa mowan ja shaka panked-abasi nodta kadasan na enshiy dames to, inon-an shen nakkit ta emin sota kadasan, pati damot to.

²¹ Ninemnem nen Pedro sota inkowan da nen Jesus so nonta kadasan et kowan to son Jesus ey, "Apo, asas mo kari! Nakkit sota kadasan na in-abigan mo."

²² Simongbat si Jesus ja kowan to ey, "Pamati kayo son Apo Shiyos.

²³ Agpayso iya ikowan ko son si-kayo. Angken sipen too, no memati son Apo Shiyos ey tong-palen to sota ishawat to son si-kato, ja enshiy showashowa to, sigoradon eg nagshengan i mebedin ton dag-en. Mebedin na ikowan to niyay ya shontog ey ma-tan shorog ja ondaw shima baybay et mayto-to-wen medeka.

²⁴ No ngantoy ibaga jo so nen Apo Shiyos, ewaten jo, no enshiy showashowa jo nonta panakabalin ton mengi-kan son si-kayo.

²⁵ "Jet no maramen kayoka manshewat son Apo Shiyos, ey waray nemnemen jon eg jo kosto ja inpasing ni eshom son si-kayo, mesepol la pekawanan jo sotan na too, say si Apo Shiyos ja Amejo shi dangit, pekawanan to ngoy nanbasolan jo.

²⁶ Nem no eg jo pekawanan ira sota toon waray nanbasolan sha son si-kayo, si Apo Shiyos ja Amejon wared dangit, eg tokejo ngo pekawanan ni nanbasolan jo.”

Sinongbatan nen Jesus sota ira eg makakosto ni dingdingka tod Jerusalem

²⁷ Idi mimotok ma ira mowan shi Jerusalem, dimaw shima Timplo, jet idi emanpasiyal si Jesus shima bo-dayan ni Timplo, en simbi nonta ira apo ni papashi tan sota mamaistoro ni dinteg tan sota ira eshom ma pangolo ni Hodiyo.

²⁸ Kowan sha son si-kato ey, “Sipay engikowan ey dag-en mo ira ta moka dagdag-a shiya Jerusalem? Sipay engibetkag son si-kam?”

²⁹ Simongbat si Jesus ja kowan to ey, “Ibag-an takejo nin, jet no songbatan jo ni kosto iya salodsod ko, mebedin na ikowan ko son si-kayo no sipay engibetkag ali son si-kak ja mandeka niyay.

³⁰ Ikowan jo son si-kak nem sipay engibetkag so nen Juan ja en memonjag nontan — nemnem to ngo shorog, ono inbetkag ali nen Apo Shiyos? Songbati jowak ka.”

³¹ Nem sota ira pangolo ni Hodiyo, nantatabal ira ja kowan sha ey, “No ikowan tayo ey si Apo Shiyos, mesampolo kito tep ikowan to ey, ‘No kasta, apay nga eg jo ngarod pinati si Juan?’

³² Nem no isongbat tayo ey nemnem ngo nen Juan, ngaranto ma?” (Ta sota ira pangolo ni Hodiyo, entakot sha ira sota karakdan na totoo

tep shaka pati-en pasiya ey si Juan ket podnon inbetkag ali nen Apo Shiyos ja para padto.)

³³ Jet say songbat sha so nen Jesus, kowan sha ey, “Tawéy, eg mi amta no sipay engibetkag so nen Juan ja memonjag.”

Jet kowan ma nen Jesus ngo son si-kara ey, “Angken si-kak ngo, ekak ikowan son si-kayo no sipay engibetkag son si-kak ja mandeka niya naka dagdag-a niman.”

12

In-arig pay nen Jesus sota makedsel la inpa-gajowan ni makabo-day

¹ Si Jesus, in-arigan to sota ira totoo, ja kowan to ey, “Waray toon nanmola ni obas shi embanaw wa gardin to; inedad to, tan engaot ni kaysespa-an nonta shapidan ni obas, tan engitowen pay ni baley ya kowadja-an. Inpa-ajowan to so ni eshom et dimaw ma shi arawin ili.

² Idi simabi sota timpon pekibingay to nonta obas, engibetkag ni baga-en ton en mengeda nonta bingay to so nonta ira engajowan.

³ Nem sota engajowan, sinepsepdat sha et sota baga-en na inbetkag nonta makakokowa nonta bo-day, tan inpa-odiren enshiy sha in-akan.

⁴ Sota makabo-day, engibetkag mowan ni sakey ya baga-en to, nem pineg-as shay toktok to, asan shaka bebaingi pay.

⁵ Engibetkag sota makabo-day ni baga-en to mowan, nem saja inbetkag ton maykepintedo, binonora. Inpantataned nonta makabo-day i

eshakel la inbetkag to, nem sinepdad shay eshom, ey binonoray eshom.

⁶ Idi anongosto ma, sakey bengat ma i ebay-an na ibetkag to, ja anak ton mismo, ja ensemek ton pasiya, jet si-kato may inbetkag to, ja kowan to ey, 'Mebedin emon ibaingan sha iya anak ko.'

⁷ Nem idi mimotok sota inbetkag to ja mismon anak to, kowan et nonta ira engajowan ni tabtabal sha ey, 'Sajay met sota anak nonta makakokowa niya gardin na tayoka pan-obda-i. Bono-en tayo et say saja bo-day ya tewiren to koma, kokowa-en tayo ma.'

⁸ Binonora nga agpayso sota anak nonta makabo-day nontan et inbo-day sha nodta alad nonta gardin." Kowan nen Jesus ni arig to.

⁹ Jet nontan ma, kowan nen Jesus ey, "Nganto emoy pesing nonta makakokowa nontan na bo-day so nonta ira toon inpangajowan to? Simpri ondaw ali et bono-en to ira jay ya too ngo, jet ipiyal to sota bo-day to so ni eshom ma mengajowan so.

¹⁰ Eg jo amten mengi-odog aya nonta esel nen Apo Shiyos ja naysolat nonta bayag da? Kowan to met ey,

'Sota baton binedaw ira nonta para amag ni baley, ja kowan sha ey enshiy silbi to, si-kato et ngo mowan gayam i epateg ga bato so ni emin.

¹¹ Si Apo Shiyos i makabaal niyay ya edaga jet kaskasshaw i tayosoka pengidmang.' "

¹² Edawag ey sota makakontra son Jesus, si-karay naytorongan nonta arig ga inkowan nen Jesus. Isonga kowan sha ey seskelen sha si Jesus, nem entakot sha ira sota eshakel la totoo.

Pineshas shen saolen si Jesus maypangkep nonta bayad ni bowis

¹³ Say inpasing sha, engibetkag ira ni eshom so nonta ira Parisiyo tan too nen Ari Hirodis ja en menaol son Jesus say wáray ikowan ton esel ja ipangbalan sha so ey wáray basol to.

¹⁴ Idi simabi sota inbetkag sha son Jesus, kowan sha ey, “Maistoro, amta mi ey podnon emin sota kowan mo, tan amta mi pay ey enshiy moka pabori, angken ngantoy katoo to. Sota torom ket si-katoy piyan nen Apo Shiyos ja dag-en ni totoo. Isonga iyay i ibaga mi son si-kam. Maypeshit aya shi dinteg tayon Hodiyois i panbedjad ni bowis so ni gobirnod Roma, ono enshi?”

¹⁵ Manbedjad kito ono enshi?”

Nem si Jesus, amta to ey tapang bengat iya salsodsod sha jet kowan to son si-kara ey, “Ngantoy jowaksoka pansaoli so? Alekayo di ni sakey ya salepi say on-an ko.”

¹⁶ In-aknan sha ni sakey et kowan to ey, “Sipay makadopa niyay ya naymalked ja pilak? Tan sipay makangaran niya naysolat?”

Simongbat ira ja kowan sha son si-kato ey, “Sota ari shi Roma.”

¹⁷ Jet kowan ma nen Jesus son si-kara ey, “No kasta, sota pilak ja joka osala, edapod gobirno ni Roma, isonga mesepol met laeng nga pa-odiyo son si-kara. Sota kowan ni gobirno ey may-ekan son si-kara, mesepol la maytongpal, jet sota kowan ngo nen Apo Shiyos ey may-ekan son si-kato, mesepol ngon mepati.”

Jet ireka messhaaw wa pasiya nonta insongbat nen Jesus.

Pineshas sha mowan si Jesus maypangkep nonta panbiyag mowan ira nonta nanketey

¹⁸ Waray Hodiyo iren kowan sha ey Sadosiyo, ja say pamatira, kowan sha ey eg kono manbiyag mowan i nanketey. Dimaw ngo ira di son Jesus i eshom son si-kara, jet sha inbag-an, ja kowan sha ey,

¹⁹ “Maistoro, say insolat nen Moises nonta bayag da ja dinteg tayon Hodiyo, kowan to ey no sota dakin engasewa ket metey ja enshiy potot to nodta asewa to, sota agi nonta dakin etey, si-katoy mengelbat nonta istay asewa nonta agi to, say balang nem waray enaken sha, et say sota anak sha, maybidang ey singa potot nonta etey den agi to.

²⁰ Iyay i piyan min ibaga. Nontan da kono, waray piton san-a-aki, jet sota pangodowan, engasewa; nem etey ya enshiy to inpotot.

²¹ Jet sota maykadwen agi to, inelbat to sota asewa nonta agi ton etey, nem etey mowan sota daki. Kasta met sota maykatdon agi sha. Emin ira jay ya piton san-a-aki ja nansasa-dat ja engasewa nontan na sesakey ya bii, etey ira ja enshiy sha inpotot.

²² Jet shi ka-onoran, etey kono ngo sota bii.

²³ Sajay i piyan min ibaga son si-kam: no bilang ey onsabi ali sota timpon pan-ongal ira ni nanketey, sipa emoy koston maka-asewa ali so nontan na bii? Ta nan-i-inelbat met ira sota piton san-a-aki ja engesewa son si-kato.”

24 Simongbat si Jesus ja kowan to son si-kara ey, “Esama kayo, jet say kabol, eg jo inewatan sota esel nen Apo Shiyos ja naysolat nonta bayag da, tan eg jo pay amta sota panakabalin to.

25 Ta sota totoon pan-ongal ali nen Apo Shiyos, eg ma ira mengesawa, ta ingesen sha ira sota anghil.

26 Nem sigosho eg jo pati-en ey manbiyag mowan sota nanketey. Apay eg jo aya binasa sota kowan nen Apo Shiyos son Moises ja edapo nodta emanshedang nga kadasan? Insolat nen Moises nonta bayag da i esel nen Apo Shiyos, ja kowan to ey, ‘Si-kak si Apo Shiyos, ja Shiyos shi Abraham, Isaac, tan si Jacob!’

27 Say olog niyay, angken etey mangon ebayag i bakdang shi Abraham, kowan nen Apo Shiyos ey mabiday ired sango-an to. Ta no enshi koma, istay eg to inkowan ey si-katoy Shiyos sha. Esama kayon pasiya.”

28 Sota sakey ya maistoro ni dinteg ni Hodiyo, imesop son Jesus tan sota ira Sadosiyo ni shaka pansongbat, jet intenengan to ja mapteng i kepenongbat nen Jesus. Isonga inbag-an to ngos Jesus, ja kowan to ey, “Towa nodta bilin nen Apo Shiyos i kapatkan so ni emin?”

29 Simongbat si Jesus ja kowan to ey, “Say kapatkan so ni emin na bilin, sajay: ‘Si-kayon totoo Israel, itnengiyo iyay. Si Apo Shiyos ja Shiyos tayo, si-kato bengat i podnon Shiyos, enshiy eshom.

30 Isonga si Apo Shiyos i topogen mon sesmeken, ja si-katoy pengitoshongan mo ni emin

na wára son si-kam — emin na wáred posom, emin na nemnem mo, tan emin na kedsang mo.’

³¹ Jet say maykadwá, sajay: ‘Semek moy kait mon too ja inges toy moka penmek ni bakdang mo.’ Sajay ya showen bilin nen Apo Shiyos i kapatkan so ni emin; enshiy eshom ma bilin ja maka-inges niyay.”

³² Sota maistoro ni dinteg ja nansalodsod son si-kato, kowan to ma ey, “Apo, kosto ita songbat mo ey si Apo Shiyos bengat i podnon Shiyos, enshiy eshom.

³³ Jet no si Apo Shiyos i topogen tayon sesmeken, ja si-katoy pengitoshongan ni emin na wáred poso tayo, nemnem tayo, tan kedsang tayo, tan no sesmeken tayoy kait tayon too ja inges toy tayoka penmek ni bakdang tayo, arawin mapmapteng iyay son Apo Shiyos ey say sota pengileton ni animal son si-kato, ja angken nganton daton.”

³⁴ Inon-an nen Jesus ey mapteng i songbat nonta too, isonga kowan to son si-kato ey, “Shanshanin wáren emin son si-kam i banag ja kabol ni kayda-kaman shi pantoshayan nen Apo Shiyos.”

Jet manipod nontan, polos malen eg intoled ni angken sipen too ja nansalodsod son si-kato.

³⁵ Idi emantosho si Jesus shi Timplo, inkowan to ey, “Apay ngarod nga kowan ni mamaistoro ni dinteg ey sota inkari nen Apo Shiyos ey ibetkag to din mengisedakan ket medepo bengat shi poli nen Ari David nonta bayag da?

³⁶ Ta angken si Ari David shorog, inkowan to ey pangolo to sota mengisedakan ali. Intorong met

ni Ispirito Santo nen Apo Shiyos si David nonta engikowanan to ey,

‘Si Apo Shiyos, inkowan to so nonta pangolok ey ontongaw si-kato shi apit ni kanawan to, ingkatod enshiy mebedin nonta kabakal to, ja wára ma ired shalokap ni shapan to.’

³⁷ Jet no kowan nen Ari David ey pangolo to sota mengisedakan ali, toway inpasing to ja kowan sha ey poli ali nen Ari David?”

Eshakel i totoo nontan ja emengitneng ni kowan to jet pipiyan shen pasiya ja itenengan.

³⁸ Inkowan to pay ni tosoka pan-itoro ira so ey, “Tanshaaniyo ira ja mamaistoro ni dinteg ta baka ma-edinan kayo. Pipiyan shen manbesho ni nankedayag ni sha panpasiyal, tan pipiyan sha pay ya rispito-en ni totoo ira ja semsemano-an shima malkaro ja karakdan ni too,

³⁹ tan shima sa-nopan, pipiyan sha pay ja ontongaw shima naysaganen tongawan say mebigbig ira, jet agdalo no timpo ni piyasta, sotan i shaka pesing.

⁴⁰ Manpa-otang ira mango nonta bibiin nankebalo jet no enshiy ibayad sha, piditen shen angken sota baley sha i ibayad sha. Jet no ondaw ired ma sa-nopan, say shaka pesing nga mena-din ni kakedsel sha, shaka ishokey i shawat sha son Apo Shiyos, say ikowan ni too ey maronong ira. Nem amta nen Apo Shiyos iyay et ebadbadeg i penosa to son si-kara!”

Epateg sota in-akan ni ebalon bii

⁴¹ Wara nonta pinsak si Jesus shi nay-esop nodta kakon ja kay-ini ni alos shi Timplo. Sota ira bebaknang, ebadeg i pilak ja shaka i-iyen.

⁴² Nontan na oras, wara ngoy sakey ya ebalon biin ebiteg ja en engi-kas ni showen engkokonting nga siljo, ja manbenol ni sakey ya sintimos.

⁴³ Tina-wal nen Jesus ira sota too to et inkowan to ey, “Ikowan ko son si-kayo, sajay ya biin ebalo, ja ebiteg ga pasiya, epatpateg sota in-akan ton alos to nem say sota ira eshom ma engi-kan ni alos sha.

⁴⁴ Ta sota ira eshom, sobda ni pilak sha i sha in-akan, nem sajay ya biin ebiteg, in-akan ton emin i oltimon wara son si-kato — angken sota istay panbiyag to koma.”

13

Indawag nen Jesus sota maypangkep ni pan-tepos ni dobong

¹ Idi bimo-day si Jesus shi Timplo, imesel i sakey ya too to, ja kowan to son Jesus ey, “Apo, nankemapteng ira ja balbaley shiya nandiniked ni Timplo, tan memapteng ima engkakembaleg ga bato ja nay-amag shiyay! On-im, apo!”

² Nem si Jesus, simongbat son si-kato, ja kowan to ey, “Owen, bisnayo niman ira ja mapteng nga baley. Tep wara aliy timpon onsabi ja angken sakey so ira nima baton mapteng i inkay-amag to, enshiy en mebay-an shima nay-amagan to; mesheshal la emin.”

³ Idi pinsak ja wares Jesus ja timongaw shima shontog ja kowan sha ey Olibas, ja naymamang

nodta Timplo, abos nen Pedro, si Santiago, si Juan, tan si Andres, jet insho-petan sha si Jesus, ja kowan sha ey,

⁴ “Piyán min amta-en no pigan ali ita kowan mo ey kesheshal niya Timplo. Tan nganto pay i amta-an mi so ey shanshanin mepesamak itan?”

⁵ Simongbat si Jesus ja kowan to son si-kara ey, “Nemnemnem jo koma iyay. Karekayo pa-olbod so ni angken sipa,

⁶ ta eshakil aliy toon mengosal ni ngaran ko, ja ikowan sha ey si-kara si Cristo, jet eshakil noman i totoon may-owapan.

⁷ Jet wára pay i mismon mankokobat ja itenengan jo, tan wáray shemagen jon kobat shi eshom ma ili. Nem karekayo meshanagan. Tep kenshat ta mepesamak ira jay, nem aliwén sotan i ka-amta-an to ey shanshani may pantepos ni dobong.

⁸ Angken ili tan ili, mankobat ira, jet angken pay sota ka-ili-ilin intorayan ni a-ashi, mankokobat ngo ira. Wara pay i jegjeg shi kedogadogad, tan epaladon bitil. Nem emin iyay ya mepesamak, sajay i panshoki-an bengat ni digat.

⁹ “Pantanshaan kayo, ta wáray eshom ma totoo ja mengidaw son si-kayo shi oskaro. Tan angken shima sa-nopan sha, sepsepdaten shakejod man pay. Jet ikoyod shakejo pay shi sango-an nonta ira gobinarol, tan sango-an nonta ira ari, ta too takejo. Jet sotan i wáya jon mengiringan na mengikowan son si-kara ni maypangkep son si-kak.

¹⁰ Jet sota mapteng nga shamag maypangkep ni pantoshayan nen Apo Shiyos, maypedawag shi

emin na ka-ili-ili asan kesabi may pantepos ni dobong.

¹¹ No ma-shel kayo ja mebistigal shi oskaro, karekayo meshanagan no ngarantoy isongbat jo son si-kara, no diket sota maypa-amta met laeng son si-kayo nontan na oras ja shakejosoka pan-ibag-i, sotan i isongbat jo. Ta aliwén si-kayon mismo i onsongbat so, no diket sota Ispirito Santo nen Apo Shiyos.

¹² “Jet sajay alin timpo, angken san-agin daki, ibaag nonta sakey i agi to shi eshom, ey eg et meshanagan ey bono-en sha. Inges niyay met laeng i pesing ni a-ama shi annak sha. Jet angken sota ira a-anak, kontra-en shay maka-anak son si-kara et pebonora pay ira.

¹³ Jet angken si-kayo, sota joka pematí son si-kak, si-katoy kabol la okesan shakejo so ni karakdan na too. Nem sota mengitoded ni angken nganton digat ja onsabi son si-kato, si-katoy maysedakan.

¹⁴ “Jet on-an jon mepesamak sota naypadto nonta bayag da ja kowan sha ey ‘Kataktakot alin ondogit’. Jet isaad toy toray shi dogad ja enshiy kanebengan ton man-iyán. (Sota memasa niyay, ewátan to komay kaytoshongan niya kowan nen Jesus.) No on-an jo iyay, say pesing koma ira nonta naytompong nga wáred Jodia, onbetik ira et ja manbakwit shi shonshontog.

¹⁵ Sota toon maytompong nga man-adibay shi bo-dayan, eg to koma nemnemen ja onsekep shima baley to ja en mengeda nonta kompormin wára nodta naydaem ni baley.

16 Kasta met sota wáred payew, eg koma mesiwát ni aleto nonta insepa ton baro to.

17 No timpon kepesamak niyay, kakaasi ira din pasiya sota bibiin malokon, tan sota bibiin wáray anak shen emenoso.

18 Irewát jo son Apo Shiyos ey eg koma mepesamak iyay ni timpon powek, say mariwés i pentik jo.

19 Ta sotan alin digat ja onsabi, enshiy to kay-ingesan nodta ira digat ja epaspasemak, manipod nonta pinalsowa nen Apo Shiyos iya dobong ingkato niman.

20 No eg ninemnem nen Apo Shiyos ey tikeyen to iyay alin digat, istay angken sipen too, enshiy mebay-an na mebiyag. Nem si Apo Shiyos, tikeyen to iyay ya digat, ta toka isakit ira sota too ton pinidi to, ja i-okong ton para si-kato.

21 “Sotan alin akew, no wáray mengikowan son si-kayo ey amtaray kad-an nen Cristo, ja kowan sha ey jo asen, karejo patpati-en.

22 Ta eshakil aliy toon kowan sha ey si-kara si Cristo, ono kowan sha ey si-karay para padto nen Apo Shiyos, jet eshakil i dag-en shen kaskasshaaw wa aramid ono milagro. Jet no mebedin, kowan sha pay ey i-owapan sha ira sota too nen Apo Shiyos ja pinidi to.

23 Nem tanshaaniyo ira jay! Naka pan-isigod iya banshaan son si-kayo say amta-en joy mepesamak ali.

24 “Jet no onsabi sotan na timpo ja kekshengan nonta digat, ma-shep shagos sota niyal ni sekit tan bolan,

²⁵ jet sama talaw, mepedaspas ira, jet mebediwan i itsora nima naykayang.

²⁶ No meksheng iyay, mismon asen sha-ak ni totood dobong ja ma-odopanak ali ni kolpot, tan asen sha pay i itsora ni bakdang kon emenenili, tan asen sha ngo sota ebadeg ga panakabalin ko.

²⁷ Jet ibetkag ko iray anghil ko ja mengolnong ira nonta pinidik ja took shi emin na sakop niya dobong, shi angken towen dogad.”

²⁸ Jet si Jesus, arig mowan i inpasing ton engilewag nonta idaw to mowan ali, ja kowan to ey, “Nemnem jo kari sota kadasan na kowan sha ey higos. Shiya kad-an tayo, no asen jon ondongkey sota panga to, asan somimit mowan i bolong to, amtayo ma ey shanshani sota timpo ni petang.

²⁹ Inges niyay aliy i-olik. No asen jon eman-ketongpal ira ja inkowan ko la, amtayo ma ey sota timpon idaw ko ali, shanshani ma, ja singa wara-ak nodta pasbol.

³⁰ Podno iyay ya ikowan ko son si-kayo. Saja ira too niman, eg ira nin metey, no diket sa-kopen shen emin ira jay ya mepesamak ali.

³¹ Sama naykayang tan saja dobong, mebedin na ma-enshi, nem saja esel la inkowan ko, kenshat ta metongpal, ja eg ma-enshi.

³² “Nem si Apo Shiyos bengat i maka-amta no pigan i ketongpal niyay ya inkowan ko la. Angken sama anghil shi dangit, tan si-kak ja Anak nen Apo Shiyos, eg mi ngo amta.

³³ Isonga pantanshaan kayo; mesepol la esagana kayo ni olay, mesepol la manshewat

kayo ni olay son Apo Shiyos. Ta eg jo amta sotan alin timpo ja idaw ko di.

³⁴ May-eshig i kasesaad jo nodta baga-en nonta baknang. Sota baknang, wáray dawán ton nay-arawin ili, isonga indekjas to sota baley to et sota ira baga-en toy maka-amta so. In-epeng toy obda son si-karen emin et inbilin to ey sota para dekeb ni baley, singpeten ton manbantay ni baley.

³⁵ Sajay i kay-eshigan jo, isonga mesepol la esagana kayo ni olay, ta eg jo amta nem pigan aliy imotok nonta apo jo — no mama-shem, ono kawa ni dabi, ono nem ikagang ni manok ni daem, ono agsapa. Isonga pan-alisto kayo,

³⁶ say no bilang ey onmotok sota Apo jo ni palibdibag, eg tokejo sa-kopan na na-ogip.

³⁷ “Saja ikowan ko son si-kayo, emin na tooy naka pengikowani so: pansagana kayo ngarod!” Sajay ya emin, inkowan nen Jesus.

14

Nantatabtabalan nonta makakontra son Jesus i pesing shen memono son si-kato

¹ Showen akew pay et onsabi sota piyasta ni Hodiyo ja kowan sha ey Paskowa, tan sota piyasten pangan sha ni tinapay ja enshiy daok ton para debag. Jet nontan, nantatabtabal ira sota apo ni papashi ni Hodiyo tan mamaistoro ni dinteg no ngantoy pesing shen memono son Jesus, jet ninemnem sha ey olboren sha kono say ma-shel et mebono.

² Mesepol la olbod i pesing sha kono; isonga kowan sha ey, “Aliwén tayo itompong no timpon piyasta, ta baka et ey mankodo ira sota eshakil la totoo.”

Shino-jagan ni sakey ya bii i toktok nen Jesus ni emanseng-ew wa dana

³ Jet nontan na akew, wáres Jesus shi Bitania, shima baley nen Simon ja istay ebaybayang i bakdang to. Emengan si Jesus nodtan na baley ey wára ngoy biin dimaw ali son si-kato, ja engita-jon ni danen emanseng-ew ja nay-iyen shi botilja. Sajay ya dana sota kowan sha ey nardo; epalit ta pasiya i tongkal to. Dinokatan nonta bii sota botilja et insho-jag tod toktok nen Jesus.

⁴ Nem wáray eshom ja engasas niyay et ireka mankotot, ja kowan sha ni sakey tan sakey son si-kara ey, “Ngantoy inpakewasan to so emo nima dana?”

⁵ No istay indako to koma sotan na dana, mebedin na asdeg to komay may-ekan so nonta ira nankebiteg! Ta say banol nontan na kalasin dana, no maydeko ket tedon dasos.” Jet in-seg-ang sha pay sota bii.

⁶ Nem si Jesus, kowan to ey, “Baybay-iyó ita bii; karejo bedawen. Ta mapteng ita dingka to son si-kak.

⁷ Sota ira nankebiteg, wára ni olay son si-kayo, isonga no piyan jon ontolong son si-kara, mebedin; nem si-kak, eg mebedjag i pekikadwak son si-kayo.

⁸ Saja bii, dingka toy kabaalan ton dag-en, ta saja dana ja insho-jag to son si-kak, singa toka pan-isagana i kaybebka niya bakdang ko ali.

⁹ Jet agpayso iya ikowan ko son si-kayo. Shiya intiron dobong, no maytoshō sota mapteng nga shamag maypangkep son si-kak, sajay ya dingka niyay ya bii, pekipedawag sha jet eg medib-dibkan.” Kowan nen Jesus.

Bimaki si Judas ta ekitodag so nonta ira makakontra son Jesus

¹⁰ Si Judas Iskariote, ja sakey so nonta ira sampolo tan showen apostol nen Jesus, dimaw ja en ekitbal so nonta ira apo ni papashi no ngantoy pesing ton mengitosho ni kawad-an nen Jesus say seskelen sha.

¹¹ Idi intenengan sha iya kowan nen Judas, ireka man-imdeng, jet inkari sha ey i-aknan sha ni pilak. Jet nontan ma, wára ni olay shi nemnem nen Judas no toway pesing ton mengibaag so nen Jesus son si-kara.

Sota ka-onoran na pekipengan nen Jesus so nonta ira apostol to

¹² Shimanon sota pilmiron akew ni piyasta, ja shaka pengan ni tinapay ya enshiy daok ton para debag tan shaka pemalti ni kalniron sid-an sha nem Paskowa, isonga sota ira apostol nen Jesus, inbag-an sha, ja kowan sha ey, “Toway piyan mon dawán mi ja pengisekana-an mi ni penganan mo nem ma-shem, tep Paskowa ma?”

¹³ Jet nontan, si Jesus, engibetkag ni showa so nonta ira apostol to, ja kowan to ey, “Daw kayod Jerusalem, jet no onmotok kayod man, waray dakin aspolen jo ja emasan ni salaw ja na-inan ni shanom. Onod jo,

¹⁴ Jet nodta baley ja seskepan to, ikowan jo iyay so nonta makabaley: ‘Kowan ali nen Maistoro son si-kam ey towa konoy kowadton penganan to tan si-kamin too to niman na ma-shem, tep Paskowa?’

¹⁵ Jet ipa-sas to son si-kayo i embanaw wa kowadto nodta naykayang, ja wara nodtan na emin i mesepol tayo ja naysagana. Si-katoy pengisekana-an jo ni kenen tayo nem ma-shem.” Kowan nen Jesus so nonta showen inbetkag to.

¹⁶ Dimaw ira sota shadwa shi Jerusalem et idi mimotok ira, siya, kosto noman na nay-agpayso sota kowan nen Jesus son si-kara. Jet insaganared man sota kenen sha nontan na ma-shem.

¹⁷ Idi mama-shem mala, si Jesus tan sota sampolo tan showen apostol to, dimaw iren mengan nodtan.

¹⁸ Jet idi maramen ireka mengan, kowan nen Jesus ey, “Agpayso iya ikowan ko son si-kayo. Waray sakey son si-kayon ekilikob son si-kak niman ja mengibaag son si-kak so nonta ira makakontra son si-kak!”

¹⁹ Jet sota ira too to, ensakit ta pasiya i nemnem sha, jet kowan ni sakey tan sakey son Jesus ey, “Sipa? Aliwen si-kak emo?”

²⁰ Simongbat si Jesus ja kowan to ey, “Say ondaga niyay, agpayso ey sakey son si-kayon sawal ni showa. Sota nay-okob son si-kak shi sakey ya pingkan, si-kato sotan.

²¹ Si-kak sota kowan ni para padto ey Anak ni Too jet kenshat ta metongpal sota padto ja naysolat nonta bayag da ni maypangkep son

si-kak. Nem kaasi met laeng sotan na toon mengibaag son si-kak, ta meshosen pasiya! No da-kaman to sotan na shosa, ikowan to shorog shi bakdang to ey, 'Agpos et nem ekak koma nay-anak!' ”

²² Jet nontan na maramen ireka ma emengan, inda nen Jesus sota tinapay et idi naksheng nga nan-iyaman son Apo Shiyos, shinowashowa to, jet in-akan to nodta ira apostol to, ja kowan to ey, “Iya, alejo iyay. Sajay i bakdang ko.”

²³ Jet idi naksheng, inda to sota tasa et idi nan-iyaman son Apo Shiyos, in-akan to mowan son si-kara, jet nan-inom iren emin.

²⁴ Jet kowan nen Jesus ey, “Sajay i shalak ja on-ayos ali ja para pansigshan ni eshakel la totoo. Ta sota ketey ko di, si-katoy panshoki-an nonta badon pesing nen Apo Shiyos so ni totoo.

²⁵ Agpayso iya ikowan ko son si-kayo. Sajay i ka-onoran na penguinom ko ni shanom niya obas, jet ekak nin menginom ingkatod onsabi sota penguinom ko nonta badon shanom ni obas shima pantoshayan nen Apo Shiyos.”

Insigod nen Jesus ja inkowan sota ngaaw wa pesing id li nen Pedro

²⁶ Nankansiyon ira ni maypangkep ni panshedjaw sha son Apo Shiyos, jet idi naksheng, bimo-day ira nodtan na baley jet dimaw ired ma shontog ga kowan sha ey Olibas.

²⁷ Jet si Jesus, kowan to so nonta ira too to ey, “Nem ekay, ibaing jowak ka emin et onbetik kayo, ta si-katoy tongpal nonta padton naysolat nonta bayag da, ja kowan to ey, ‘Bono-en ko sota

para bantay ni kalniro et sota eman-o-odop ja kalniro, mebodak ira.'

²⁸ Nem no meksheng i pan-ongal ko, mepangdo-ak ja ondaw shi Galilia ey say si-kayo."

²⁹ Nem si Pedro, kowan to ey, "Angken ibaing shaka ni emin na kait ko, eg taka mango ibaing!"

³⁰ Simongbat si Jesus ja kowan to ey, "Podno iya ikowan ko son si-kam Pedro: niman na dabi, isaot mowak ni memintedo ja ikowan mo ey eg mowak am-anta. Jet no meksheng iyay, onkagang ngoy kawitan ni maykepinshowa."

³¹ Nem si Pedro, toka pan-ipilit ta pasiya, ja kowan to ey, "Angken na pekibono sha-ak son si-kam, ekak ikowan ey eg taka am-anta!" Jet sota ira kait ton too nen Jesus, sotan ngoy inonoran shen inkowan.

³² Jet dimaw ma ired ma dogad ja kowan sha ey Gitsimani, jet kowan nen Jesus son si-kara ey, "Tongaw kayod jay ta nak nin manshewat son Apo Shiyos."

³³ Inodop tos Pedro, si Santiago, tan si Juan, jet nontan ma, simabi son si-kato i epaladon aboshiro, jet emankaikelkel-ewin pasiya.

³⁴ Jet kowan to son si-kara ey, "Singa meteyak ni daringit ko! Shiyay kayo nin, karekayo ma-okip."

³⁵ Idi naksheng nga inkowan to iyay, bintawan to ira ni ootik, jet nanshomog shi bo-day ja nanshawats son Apo Shiyos ey no mebedin koma, eg manda-kam nonta digat alin onsabi son si-kato.

³⁶ Kowan to ey, "Ama, kabedinan moy angken nganto, isonga eg mo koma ipalobos iyay ya

pandikat ko di. Nem say kowan ko, sota piyan mo, si-katoy metongpal; aliwén sota kostok.”

³⁷ Idi imekwás, dimaw ja to inon-an sota too to jet simbi to iren na-ogip. Jet kowan to so nen Pedro ey, “Na-ogip ka, Simon? Apay, eg mebedin ja itoled moy jo-kew mo ni angken sakey ya oras bengat?”

³⁸ Panmolakat kayo jet pansawat kayo ngo so nen Apo Shiyos ni kedsang say eg shakejo ebaken ni ngaaw wa onsabi son si-kayo. Sota nemnem jo, makedsang niman, nem baka et ey ma-ebak kayo tep ekapoy i bakdang jon ontongpal nonta wáred nemnem jo met laeng.”

³⁹ Dimaw mowan si Jesus ja en manshawát son Apo Shiyos, jet iso met laeng i inkowan to ni shawat to son Apo Shiyos.

⁴⁰ Jet nay-oli mowan ali jet simbi to ira sota too to ja na-ogip, ta epaladoy jo-kew sha. Jet eg sha amtay isongbat sha son si-kato.

⁴¹ En nansawat si Jesus ni maykepintedo et idi nay-oli mowan ali so nonta ira too to, kowan to son si-kara ey, “Ngantoy? Piyan jon ma-okip ni olay? Nem eti, simabi ma sota timpo, jet si-kak ja kowan ni para padto ey Anak ni Too, may-ewatak ma so nonta ira toon nankekedsel.

⁴² Ondaw kito ma niman. Iyay ma ali sota mengibaag son si-kak.”

Si Jesus, inshel ma nonta makakontra son si-kato

⁴³ Idi maramen eman-a-sel si Jesus, si Judas Iskariote ja sakey so nonta ira sampolo tan showa ja apostol nen Jesus, engolop ali ni eshakil

la totoo. Sota eshom, nan-etak ira, tan sota ira eshom, wáray peg-as sha. Sajay iren too, inbetkag ira nonta apo ni papashi, mamaistoro ni dinteg, tan pangolo ni Hodiyo.

⁴⁴ Si Judas Iskariote, insigod ton inkowan so niya ira inodop to ey, “Say pengimatonan jo son Jesus, ongo-an ko. Tenggel jo et ibtik jo; jet singpet jo men kowadja-an.”

⁴⁵ Isonga idi dimaw alis Judas shi kad-an nen Jesus, insopan to et kowan to ey, “Apo!” Jet inongo-an to ja singa agpayson ensemek to noman.

⁴⁶ Jet sota ira inodop ali nen Judas Iskariote, dimaw ira di et tinngel shen shagos si Jesus ja a-shelen sha ma.

⁴⁷ Nem sota sakey ya too ja wára nodtan, inokbos ton shagos i kumpulan to et kinimpas toy tangida nonta sakey ya baga-en nonta kangeto-an na pari.

⁴⁸ Jet kowan ma nen Jesus so nonta ira eshakil la totoo ey, “No si-kak i kowan jo ey a-shelen jo, apay nga nan-etak kayo, tan wáray peg-as jo? Apay tolisanak?”

⁴⁹ Inakew met ja wára-ak son si-kayo shima Timplo ja emantoso, ket apay nga eg jowak inshel nontan? Nem angken, mesepol la sajay i medeka say metongpal sota padton naysolat nonta bayag da.” Kowan nen Jesus.

⁵⁰ Jet emin ira sota too to, namtik ira jet indekjas shes Jesus.

⁵¹⁻⁵² Sota sakey ya balodaki, ja too met laeng nen Jesus, istay peki-shel sha son Jesus, nem idi kowan sha ey seskelen sha, kimopos nodta

empotin abel ja inketap to nodta bakdang to et namtik ja nandabos.

Indaw shes Jesus nodta totoon pangolo ni Hodiyo

⁵³ Jet si Jesus, indaw sha nodta baley ni kangeto-an na pari, jet shiman i na-olnongan ira nonta mamaistoro ni dinteg, tan sota ira eshom ma pangolo ni Hodiyo.

⁵⁴ Jet si Pedro, tinned to ira nem bimetaw. Intoled to pay ya ekiskep nodta bo-dayan ni kangeto-an na pari. Ekitongaw so nonta ira kowadja jet ekirangshang pay son si-kara.

⁵⁵ Nontan met laeng, sota ira apo ni papashi tan sota ira esa-nop pa toray, ireka mengenap ni ikowan shen basol nen Jesus, say waray kabol la ikowanan sha so ey si-katoy kebono-an to. Nem enahiy shaka sepolen koston basol to.

⁵⁶ Ta eshakil sota sistigon dimaw ali ja o-owap i kowan sha, nem eg mankokompas i insodsod sha.

⁵⁷ Anongosto ma ey waray dimaw ali ja o-owap i insistigo sha, ja kowan sha ey,

⁵⁸ "Intenengan min mismo i inkokowan niyay ya too; kowan to ey sheshalen to kono ima Timplo ja inemag ni too, jet i-oli to kono mowan na dag-en ni tedon akew. Nem sota dag-en to, aliwen too konoy mengemag so."

⁵⁹ Nem eg met laeng nankompas i inkowan iren jay.

⁶⁰ Jet sota kangeto-an na pari, dimayat shi sango-an iren emin ja esa-nop, jet inbag-an tos

Jesus ja kowan to ey, “Jet enshiy isongbat mo? Sajay met i kowan ira niya too ey basol mo!”

⁶¹ Nem si Jesus, imeg-eket ja enshiy to insongbat. Jet sota kangeto-an na pari, kowan to ma ey, “Ikowan mo ngo no si-kam sota Anak nen Apo Shiyos ja emeshedshedjaw! Ikowan mo no si-kam sota inkari to nonta bayag da ey ibetkag to alin mengisedakan!”

⁶² Simongbat si Jesus ja kowan to ey, “Owen, si-kak ita kowan mo. Si-kak sota kowan ni para padto ey Anak ni Too, jet no ekay ali, on-an jowak ja timongaw nodta apit ni kanawan nen Apo Shiyos ja Manakabalin. Jet asen jowak ali mowan ja metaksholan ni kolpot.”

⁶³ Jet sota kangeto-an na pari, bini-nik to sota baro to shorog ni bonget to, jet kowan to ey, “Eg mesepol la wára pay i sistigo!

⁶⁴ Intenengan jo met i inkowan to! Toka pa-so-i si Apo Shiyos! Jet ngarantoy piyan jon pesing son si-kato?”

Jet sota kait ton toray, inkowan shen emin ey anam to konon mebono.

⁶⁵ Jet sota eshom son si-kara, inshogi shay topsha son Jesus. Inopop sha pay i mateto, asan shaka shengpela, ja kowan sha ey, “Sipay enengpel son si-kam? Tiga, bisto-im ka!” Jet sota ira kowadja, in-aspol shay sedpak son si-kato.

Indibak nen Pedro ey am-amta to si Jesus

⁶⁶ Wara ngo pay laeng si Pedro shima bo-dayan ni baley, jet dimaw aliy sakey ya biin baga-en ni kangeto-an na pari,

⁶⁷ jet inon-an tos Pedro ja emenangshang nodta apoy. Inningning tos Pedro et kowan to ey, “Angken si-kam met, eki-od-odop ka so nonta i-Nasarit ja si Jesus i ngaran to.”

⁶⁸ Nem si Pedro, indibak to, ja kowan to ey, “Enshiy amtak nita moka pan-ikowan! Ekak ewatan itan na moka pan-ikowan!” Jet dimaw si Pedro nodta pasbol.

Sotan ey onkagang i kawitan.

⁶⁹ Jet sota biin baga-en, inon-an to mowan si Pedro nodta dinaʻwan to et kowan to so nonta ira toon wára nodtan ey, “Sajay ya too, si-kato met i sakey ya too nonta inshel sha.”

⁷⁰ Nem si Pedro, indibak to mowan.

Idi ekay, sota ira toon wára nodtan, dimaw ira di son Pedro jet kowan sha ey, “Ayshiy showashowa! Kenshat ta si-kam i sakey ya kait to, tep too ka did Galilia!”

⁷¹ Nem si Pedro, nansangba, ja kowan to ey, “Angken shosa-en towak nen Apo Shiyos no o-owap iyay ya inkowan ko la! Ekak am-amta itan na toon joka pan-ikowan!”

⁷² Jet idi inkowan to iyay, kimagang i kawitan ni maykepinshowa. Jet idi intenengan nen Pedro, ninemnem to ma sota inkowan nen Jesus ey, “Isaot mowak ni memintedo, ja kowan mo ey eg mowak am-amta, jet no meksheng iyay, onkagang ngoy kawitan ni maykepinshowa.” Jet idi ninemnem nen Pedro iyay, nimangis sa pasiya tep naydaw-an.

15

In-awat sha ma si Jesus so nen Gobinarol Pilato

¹ Idi nonta emankewa-wa ma, sota ira apo ni papashi, mamaistoro ni dinteg, tan sota ira eshom ma toray ni Hodiyo, nantatabal ira et say inpasing sha, binedod sha si Jesus et inpaidaw sha so nen Gobinarol Pilato.

² Jet si Pilato, inbag-an tos Jesus, ja kowan to ey, “Jet agpayso ja si-kam sota ari ni Hodiyo?”

Simongbat si Jesus ja kowan to ey, “Sota inkowan mo, si-kato.”

³ Jet sota ira apo ni papashi, eshakil i inkowan sha so nonta gobinarol ja kowan sha ey basol nen Jesus,

⁴ jet si Pilato, inbag-an to mowan si Jesus, ja kowan to ey, “Enshiy isongbat mon dason mo? Apay, eg mo aya itenengan ima kowan sha ey eshakil la basol mo?”

⁵ Nem nasshaaw si Pilato, tep enshi pay i insongbat nen Jesus.

⁶⁻¹⁰ Indasin nen Gobinarol Pilato ey apal ira nonta apo ni papashi son Jesus i in-awatan sha son si-kato, isonga piyan ton ibolos si Jesus. No timpo ni piyasta ni Paskowa, waray sakey ya piriso ja kaibolos ni olay nen Pilato ja piyan ira nonta totoon ibolos to. Isonga idi dimaw aliy eshakil la too ja en nangshaw son si-kato ey ibolos to nontan i sakey ya piriso son si-kara, kowan nen Pilato son si-kara ey, “Piyon jon ibolos ko son si-kayo sota ari jon Hodiyo?”

Nem naytompong nontan ja waray sakey ya pirison nanngaran ni Barabas ja sakey so nonta

eshakel la girilya ja naybalod kabol ni inpa-monora ni inpamakal sha so ni gobirno. Isonga idi inbaga nen Pilato no piyan nonta totoo ja si Jesus i ibolos to,

¹¹ sota ira apo ngo ni papashi, intod-an sha sota eshakel la too ey say ikowan sha so nen Pilato ja ibolos to, saja si Barabas.

¹² Jet si Pilato, kowan to son si-kara ey, “Jet no sotan i kowan jo, ngaran to ma i dag-en ko so niya kowan jo ey ari jon Hodiyos?”

¹³ Jet sota ira totoo, kimiyaw ira, ja kowan sha ey, “Paidansam shi koros!”

¹⁴ Kowan mowan nen Pilato son si-kara ey, “Ngantoy? Ngaran ni dingka ton ngaaw aya?”

Nem ema-ma et i keljaw sha ja kowan sha ey, “Paidansam shi koros!”

¹⁵ Jet nontan ma, si Pilato, tep piyan ton mepnek sota eshakel la too, inbolos to ma si Barabas son si-kara. Nem si Jesus, inpasepdad to nin asan toka i-wat so nonta ira solsharo, ja sha idansa ma shi koros.

Dedamsis i inaspasing ira nonta solsharo son Jesus

¹⁶ Sota ngo ira solsharo, indaw shes Jesus shima mismon baley nonta gobinarol, jet inol-nong shen emin sota kait shen solsharo.

¹⁷ Sina-datan shay baro to ni singa baro ni ari ni Roma, ja say kolor to, sota kowan sha ey violet. Tan say inpasing sha pay ni dedamsis sha, in-inges sha ni ari. Isonga engosikos ira ni wakat la nasbitan ja inpaidnget sha son si-kato, ja singa korona to.

18 Jet singa konon shaka panrispito-a, ja kowan sha ey, “Onpalapalad ka koma, ari ni Hodiyo!”

19 Pineg-as shay toktok to et tinopsha-an sha, asan ma ira mantalimokod shi sango-an to ni sinan pateg sha son si-kato.

20 Jet idi naksheng sota inpasing shen dedam-sis, dinosora sota istay inpaibaro sha, jet in-oli sha met laeng sota sigod ja baro to. Jet inbo-day sha ma ja sha idansa shi koros.

Indansara si Jesus shi koros

21 Nonta ireka man-ekad, wára ngoy toon inaspol sha ja ondabas koma, ja si Simon i ngaran to, ja i-Sirini. Istay ondaw koma shi siyodad, nem inpasakbat sha et son si-kato sota koros ja kaydansa-an nen Jesus. (Saja si Simon, ama nen Alejandro tan si Ropo.)

22 Jet indaw nonta solsharo si Jesus shima dogad ja kowan sha ey Golgota. (Jet say olog niya Golgota shi esel sha, toktok.)

23 Idi mimotok ired man, in-aknan shes Jesus ni adak ja edaokan ni agas ja eg to so dekna-an ni ensakit. Nem eg to inewat.

24 Jet indansara ma shi koros. Jet idi naksheng nga indansara, nanbobonot sota ira solsharo no sipay ontompong so nonta ira baro nen Jesus, asan shaka panbibingayi.

25 Say oras ni inkoros sha so nen Jesus, alas nowibi ni agsapa.

26 Jet waray naysolat ja engikowan ni kabol ni naydansa-an tod koros, ja kowan to ey, “Sajay sota ari ni Hodiyo.”

²⁷ Jet wáray showen tolisan ja inpakibitay sha son si-kato shi sanseskey ya koros. Sota sakey, wára nodta petek ni kanawan nen Jesus, tan sota sakey, wára nodta petek ngo ni kanigid to.

²⁸ (Sajay i nantongpalan nonta naypadto nonta bayag da, ja kowan to ey, “Maybidang ey sakey ya bimasol.”)

²⁹ Sotan ngo ira toon emandebas ja man-ekad nodtan, ngini-ngi-ngi-an sha, tan inbi-bi-wísan sha pay, ja kowan sha ey, “Towa! Kowan mo ey sheshalen moy Timplo jet bengonen mo mowan ni tedon akew!

³⁰ Apay nga eg mo isalakan i bakdang mo shorog, ja ondespag alid ta koros mo?”

³¹ Jet angken sota ira apo ni papashi ni Hodyos, tan sota ira mamaistoro ni dinteg, ekingi-ngi ngo ira, ja kowan sha ni tabtabal sha ey, “Insalakan to konoy eshom, nem eg to met isalakan i bakdang to shorog!

³² Kowan to ey si-kato kono sota naypadton ibetkag ali nen Apo Shiyos ja mengisedakan, kowan to ey si-kato kono sota ari ni Israel. Tiga, asen tayo noman no kaba-dan ton ondespag alid ma koros to, say memati kito son si-kato!”

Jet sota kait ton showa ja inpakibitay sha son si-kato, nan-esel ngo ira ni ngaaw so nen Jesus.

Etey si Jesus

³³ Idi nonta alas dosi ni ka-akawan, nan-bolinget nodtan na dogad ingkato nonta alas tris ni mama-shem.

³⁴ Jet idi nonta alas tris ni mama-shem, si Jesus, kimmeljaw ni makedsang, ja kowan to ey, “Iloy, Iloy, lama sabaktani!” (Say olog niya kowan

to, “Shiyos ko, Shiyos ko, ngantoy in-owayan mowak so?”)

³⁵ Nem sota eshom ma toon wára nodtan, idi intenengan sha sota kowan nen Jesus, kowan sha ey, “Itnengiyo! Toka emo panta-wála ali si Elias shi dangit!”

³⁶ Jet sota sakey so nonta ira toon wára nodtan, kinano-an ton en engi-neng nonta singa bonot ja masbet ni shanom nodta empait ta tapey asan toka ipi-ket shi pating. Jet in-awat tod sobil nen Jesus, jet kowan to ey, “Ma-sas ka no ondaw ali si Elias ja en mengpas son si-kato alid ma koros!”

³⁷ Jet si Jesus, inkedsang toy keljaw to mowan, asan ma ma-bosi.

³⁸ Jet nontan ma, sota masshel la kortina ja naysa-din nodta kapatkan na kowadto shima naydaem ni Timplo, epi-kat ta nanshowa, manipod nodta naytapew ingkatod ma despag.

³⁹ Jet sota kapitan ni solsharo ja wára nodta naymamang ni kad-an nen Jesus, idi inon-an toy itsora ni inkatey nen Jesus, kowan to ey, “Agpayso gayam ey sajay ya too ket anak ni Shiyos!”

⁴⁰ Wara ngo iray bibii nodta naybabetaw ja engikadmang niyay ya epasemak. Jet say ngaran ira nonta eshom ma bibii ja wára nodtan, sajay: si Maria Magdalena, si Salome, tan si Maria ja ina ira nonta si Jose tan si Santiago ja inbeshayan shen Orishyan.

⁴¹ Sajay iren bibii, nay-olop ira son Jesus nonta wára pay laeng shi Galilia jet tinodongan sha alid man. Tan wara pay nodtan i eshakil la kait

shen bibii ja ekidaw son Jesus manipod Galilia ingkatod Jerusalem.

Indiyang sha si Jesus

⁴² Say akew wa edaga-an niyay ya emin, sota kowan sha ey akew wa Pansekana ni para sota akew wa ngilin, jet no medebi, si-katoy ibilang sha ey panshoki ma nonta akew ni ngilin.

⁴³ Isonga waray manngeshan ni Jose, ja toon edapo nodta ili ni Jodia ja kowan sha ey Arimatia, intoled ton dimaw so nen Pilato ja to kinshaw i bakdang nen Jesus. (Sajay ya si Jose, sakey so nonta ira toray ni Hodiyos. Jet si-kato, kaishayaw noman ni totoo. Tan sakey pay, si-katoy sakey ya emansessesked ni isabi ali ni pantoshayan nen Apo Shiyos.)

⁴⁴ Idi dimaw si Jose ja to kekshawen sota bakdang nen Jesus, nasshaaw si Pilato ni in-amta to so ey etey si Jesus. Isonga to inpa-odop sota apo ni solsharo et inbag-an to no agpayson etey si Jesus.

⁴⁵ Idi kowan nonta apo ni solsharo son Pilato ey etey nga agpayso, inpalobos tos Jose ja en mengeda nonta bakdang nen Jesus.

⁴⁶ Enongkal si Jose ni dopot ja para dibot ni etey, jet impas to alid ma koros i bakdang nen Jesus jet dinibotan to nonta empotin dopot ja tinongkal to, jet in-ilaw to nodta baton diniyan-gan sha jet shiman i indiyangan to so. Jet inodin to sota ebadeg ga baton tangeb nonta diyang jet inpokit to nodta sakepan.

⁴⁷ Jet si Maria Magdalena, tan sota sakey ya si Maria ja ina nen Jose, inon-an sha iyay ya naydiyangan nen Jesus.

16

Nan-ongal si Jesus

¹ Idi mama-shem ma ja edabas da sota akew ni ngilin, si Maria Magdalena, si Salome, tan si Maria ja ina nen Santiago, enongkal ira ni danen emanseng-ew, ja sha ipoyok koma nodta bakdang nen Jesus.

² Jet idi agsapa ni Domingko, ja emanbo-day aliy sekit, dimaw ira nodta naydiyangan nen Jesus.

³ Say tabtabal sha, kowan sha ey, “Sipay onposin mengkal ni baton naytangeb nodta bongot ni diyang say onsekep kito?”

⁴ Nem idi onshemang ira, inon-an sha ey na-kal gayam sota bato, ey ebadeg ga pasiya.

⁵ Simekep ira nodta diyang et inon-an shay balodakin nanbaro ni empoti ja edayag, ja timo-ngaw nodta apit ni kanawan. Jet nasshaaw iren pasiya.

⁶ Kowan nonta balodaki son si-kara ey, “Karekayo messhaaw. Amtak ey say piyan jon on-an, si Jesus ja i-Nasarit ja naydansa shi koros. Nem enshid jay, nan-ongal da! Asas jo kari ita istay inparokolan sha so.

⁷ Jet no asen jon enshi, daw kayo, jet jo ikowan so nonta ira too to ey nanbiyag mowan da, agdalo son Pedro. Jet niman, ondaw da si Jesus ja mepangdo ey si-kayo shi Galilia, jet shiman i

asanan jo so! Tep saman i inkowan to son si-kayo nonta aneng pay laeng i ketey to.” Kowan nonta balodaki.

⁸ Bimo-day mala ira sota bibii ja namtik ired diyang, tep ireka manbebayedbed ni takot sha. Jet enshiy sha inkokowan so ni angken sipa nontan tep eta-kot ira.

Nanpa-sas si Jesus son Maria Magdalena

⁹ Idi naksheng nga nan-ongal si Jesus ni agsapen pasiya ni Domingko, say kapangdo-an na nanpa-sasan to, si Maria Magdalena. (Sajay sota si Maria ja inpabtikan so nen Jesus ni piton dimonyo ja pimeket son si-kato.)

¹⁰⁻¹¹ Jet si Maria ngo, dimaw so nonta ira too nen Jesus ja nay-olop ni olay son si-kato nontan da et sina-kop to iren esa-nop ja emandeshingit tan emannengis ni inkabono nen Jesus. Jet inkowan to son si-kara ey, “Nanbiyag mowan si Jesus! Inon-an kon mismo!”

Nem idi intenengan sha, eg sha pinati.

Nanpa-sas si Jesus so ni showen too to

¹² Idi naksheng iyay, nanpa-sas mowan si Jesus so ni showen too to ja eman-ekad ja edapod siyodad ni Jerusalem. Jet na-apil i inpangidmang sha son si-kato.

¹³ Jet nan-oli sota shadwa, ja sha inkowan so ni eshom ma kait shen too nen Jesus, nem iso met laeng nga eg sha pinati.

In-awat ma nen Jesus sota ka-onoran na bilin ton epateg so nonta ira apostol to

¹⁴ Idi naksheng nga nanpa-sas si Jesus so iren jay, nanpa-sas mowan so nonta ira sawal ni

sakey ya apostol to nonta maramen ireka mengang. Jet inseg-ang to ira ni eg sha so pinati-an so nonta insodsod nonta ira engasas son si-kato ni inpan-ongal to; kowan to ey epaladoy katangken ni toktok sha.

¹⁵ Jet kowan to pay son si-kara ey, “Daw kayo shi emin na sakop niya dobong jet jo ikowan so ni emin na totoo i mapteng nga shamag maypangkep son si-kak.

¹⁶ Sota memati tan mebonjagan, maysedakan ira, nem sota eg memati, shosa-en ali nen Apo Shiyos.

¹⁷ “Jet sota ira memati, mandeka ngo ira ni kaskasshaaw wa ewatan so ni totoo ey podnoy shaka pan-itoro. Say dag-en shen kaskasshaaw, sajay: mengipebtik ira ni dimonyon pimeket shi totoo no i-osal shay ngaran ko, man-a-sel ira ni eshakil la kalasin esel ja eg sha amta;

¹⁸ angken egni-an sha pay i oleg tan inomen shay sabishong ja istay keteyan sha koma, eg ira mesekitan; tan ontakal iray emanpansekit no isakpal shay takday sha son si-kara.”

¹⁹ Jet si Apo Jesus, idi naksheng nga inkowan to iyay son si-kara, inda ma nen Apo Shiyos shi naykayang et en timongaw shi apit ni kanawan nen Apo Shiyos.

²⁰ Jet sota ira toon inbilinan to so nonta inkowan to la, nansisi-jan ira, ja sha intoro shi emin na dogad sota maypangkep son Jesus. Jet eki-obda ngo si Jesus son si-kara, isonga nayki-det sota intoro shen esel nen Jesus, tep in-aknan to pay ira ni panakabalin shen mandeka ni milagro. Siya, satan da.

**Dibshon Mengi-kan Ni Pansigshan
Ibaloi: Dibshon Mengi-kan Ni Pansigshan (New
Testament)**

copyright © 1978 Wycliffe Bible Translators, Inc.

Language: Ibaloi

Contributor: Wycliffe Bible Translators, Inc.

All rights reserved.

2025-05-03

PDF generated using Haiola and XeLaTeX on 2 May 2025 from source files
dated 3 May 2025

6f85e932-8eee-5911-b890-a31a1da75d8c